

耕学斋诗集 明 袁华

钦定四库全书

集部六

耕学斋诗集

别集类五

明

提要

臣等谨案耕学斋诗集十二卷明袁华撰华字子英昆山人生于元季洪武初为苏州府学训导后坐累逮系死于京师此集凡古体诗七卷近体诗五卷不知何人所编明史艺文志不著录考杨维桢为作可传集序称华自二十岁后三十年所积无虑千余首吾选之得如午首云云疑即所谓千余首者后人裒辑以传也明之初年作者林立华为诸家盛名所掩故人与诗皆不甚着实则衔接实具有典型非后来伪体所能及固未可以流传未广轻之华赠闵中孚初度诗有同生延佑丙辰年句以干支推之下至明太祖洪武元年已五十三岁故集中诗句元代所作为多如甲午丙申己亥庚子乙巳丙午丁未诸纪年皆在顺帝至正中惟癸丑正月风雨中偶成一首作于洪武六年颇露悲凉感慨之语蓋欲自附于元之遗民然已食明禄不必作是语矣

乾隆四十四年二月恭校上

总纂官 (臣) 纪昀 (臣) 陆锡熊 (臣) 孙士毅

总校官 (臣) 陆费墀

●钦定四库全书

耕学斋诗集卷一

(明) 袁华 撰

○骚

归来堂辞 (有序)

归来堂者相州别驾章侯之所作也侯年踰知命即解印绶归奉母夫人张于兹堂此归来所以名也侯今七十有五斑衣白髮称觞献寿此天壤人间之至乐也汝阳袁华乃作归来堂辞以美之其辞曰

翼翼兮新堂高明兮孔扬瞻青龙兮东下览凤凰兮南翔堂中美人兮金玉其相入直承明兮近日月之清光踰河湟兮度陇蜀歷井陉兮上太行瞻白云兮孤飞怅万里兮遊子羌弭节兮县车升斯堂兮奉甘旨斑衣兮被被列曾玄兮济济舞婆娑兮称兜觥乐怡愉兮岂弟新堂兮翼翼旅楹有闲兮孔安且硕繄千秋兮万年子子孙孙兮期永保而无斁

招鹤辞 (有序)

玉山顾君仲瑛哭母于吴兴之商溪归葬绰墩先塋念母九泉不可复作乃筑亭于神道之左遂仿蘋儻耽故实扁曰招鹤汝阳袁华为制招鹤辞三章俾歌以招之庶几化鹤一归少慰终天之戚云其辞曰

胎仙翱翔兮蘡珠之宫薄云汉兮溢埃风乘火精兮自养抱贞素兮气内充朝扶摇兮丹丘夕襄徊兮玄圃繄故国兮丘墟冢累累兮下土

蘡珠之宫兮胎仙翱翔美婵媛兮玄衣缟裳迟夫君兮未来攀青田兮璠芳长夜漫漫兮宵不见日子哀鸣兮血化为碧蕙帐空兮猿惊心旁皇兮反侧

新亭兮桓桓郁郁佳城兮松栢丸丸疏玉泉兮交流树琅玕兮为樊山川绸缪兮道里阻修陆有虎豹兮江有潜虬胎仙翱翔兮归休玄间窈冥兮不可以久留

哀宋姬 (有序)

宋姬者肃王枢女也幼于水滨得玉印文曰金妃之印靖康之变金主纳焉或云符印之谶夫父雠不共戴天当国亡家灭之余犹委质以求全者君子不取也姬视死特易事欲求其死以不死耳故屈身以侍巾栉傥一言以覬主听庶二帝生还虽蹈鼎镬不憾也主复徙二帝于五国城姬谏而主怒以匕首杀之予哀姬之志不克信而嘉姬之死得其所夫处变而不失常道者其惟宋姬乎其辞曰

膏吾车以北征兮遭黄龙之故城山川蚴漻以郁盘兮维完颜氏之所京系二世之雄特今日从事乎兵革何靖康之蒙尘兮身降庶而窜谪粤王枢之有女兮亦俘累而在行符玉文之印谶兮充下陈兮椒房甘委命而尽节兮羌陨身而奚益俟事机之可乘兮虽九死而不惜胡宋祚之中衰兮徙二帝于穷山之阴昧大义而共戴天兮荃不媿于中心陈谠言之謇謇兮矢弗从而继以死也何彼苍之不鉴其忠诚兮竟损生于匕首也噫吁戲天乎不仁兮俾独擅其荼毒父为虏兮国随覆身既死兮雠不能复谋弗克兮为大僇哀幽愤兮不平河流汤汤兮征鸿肃肃金源兮走鹿佑陵兮拱木陈吾辞兮吊贞淑魂其归来兮故国

○古诗（四言）

费侯兴学诗（并序）

昆山州庙学唐县令王纲所建记之者安定梁肃也五季之末废于兵宋知县边仿始克复修记之者太原王禹偁也政和迄宋季重修者屡矣国朝元贞元年升县为州置博士弟子员延佑初迁治太仓而庙学亦废越四十有三载张氏入吴以州治濒海江无以盛民而固圉也复归旧邑今守东平费侯某下车首谒庙学怃然而叹曰学校者教化之本也盖不可一日忽踰年政成民信乃出其廪稍之赢新作戟门及讲堂撤礼殿之旧而加崇广焉作斋庑以居学徒则又民之输材而为助者呜呼若费侯者其可谓知所本矣诗曰维桑与梓必恭敬止况学校乎华也叅职郡庠沐贤侯之教养覩兹轮奂实重依归乃歷考庙学之废兴为诗一章以美之诗曰

肇昔娄校王令纲作五季披攘鞠为丛薄火德阜隆芟除苛虐久郁而信圣道孔昭蕞尔吴越既入王略繄边仿氏聿来主学庀材僝工不日而落歷宋祀三百执事有恪於赫皇元龙飞朔漠诏升县为州建官锡爵置博士员以训以饬治迁于东民实新邑庙随所在兹实榛棘岁在实沈海氛梗逆复归旧治邑庐如昨明明费侯英杰卓荦既牧我娄民复繕我城郭渐摩煦妪民愈无瘼舍菜在泮考艺问业眷兹颓圮心焉怵惕相方视址爰究爰度采石于山斩木于壑工师子来乃砻乃斲乃表修桓重门有觉外象灵星内列

畫戟中严礼殿既崇且硕凤丽于甍龙攫其角言言斋庑左右翼若横经有堂释奠有乐多士遊歌有馆有穀费侯戾止在泮献酌冠弁俅俅不吴不謔顧瞻基构昔庳今扩不有君子其何能益嗟吁诸生夙蒙启迪爰止其所涵泳朝夕服我圣训伊侯之德愿侯寿考如金如石懋继前修永永无斁

送秦文仲归崇明拜祠墓诗（有序）

淮海秦君德卿教授乡里垂四十年歿而门人私谥曰孝友先生其行述见铁崖杨先生所为墓铭崇明桑梓里也至正庚子高邮张君某同知州事始白于有司列祀校官之先贤祀祠以天赐堂主李君配焉明年春正月其子约将归拜祠下并展三世松楸汝阳袁华追饯于娄之上而赠君诗诗曰

维秦氏先裔本颛帝玄鸟诞祥爰洎大费汤汤洪水佐禹平治赐姓曰嬴是为栢翳下逮非子主马汧渭厥马蕃息赏延于世助之土田锡以爵位自岐徂鄖奄有其地以国命氏子孙蹶蹶冉相非商从学洙泗卒业圣门身通六艺三辅万石汉称循吏曰绵曰族曰举曰系或栖岩穴或推孝义文鸣淮海肇自观始疏派盐城丁宋之季南迁海隅相宅天赐懿自山父威仪棣棣玉立长身清庙茂器授经于方力求源委朝斯夕斯黾勉弗替贡于通州诗冠多士粤有仲子才德粹美肥遯居贞行端学邃蔚彼凤麟为邦家瑞讲道乡里垂四十载一裘一葛不事华靡高爵荣名视若敝屣沈潜理域仁经义纬性命道德经史传记孜孜讨论由内及外立言垂宪先正是嗣后生小子为所矜式歿有门人孝友表溢崇川之阳木栱墓隧揭示素履有隆斯碣伟哉张君恂恂岂弟以仁教养以德抚字下车省俗振举淹滞表里旌贤风化所系呜呼先生匪爵而贵上陈道统乃白有司翼翼新祠翠映泮水约承家学继志述事兢兢业业罔敢荒肆春雨既濡勾萌从萃顧瞻桑梓油然孝思驾言遄归乘桴海瀛■〈鱼蠹〉波砥平云飄宵济展墓拜祠聿修厥祭何以将之旨酒肥彘言言高门列戟周卫七贵五侯充车结驷不学亡术崇殖货利未及百年子孙皂隶闻先生之风胡不少媿沧溟滔滔奔流东驶有如秦氏世泽罔既于千万年祀事不坠我作歌诗昭示来裔

武陵小隱

武陵者何娄市之梁也小隱者何史君仲先之所居也居市而曰小隱者何谦辞也赋诗者何美之也诗曰

小隱山林大隱廛市奚论小大惟适所止贞哉仲先如金如玉隱居行义不志于穀

武陵之南娄水之阴有宅一区严邃靖深其中何有有琴有瑟亦有图史积之秩秩井冽寒泉林实嘉橘芬敷沃若清阴满室匪树之茂乃德之殖其心孔仁其门多疾既隐于市又隐于医施不责报维先哲是师我作歌诗以咏以吟愿坚素履永播徽音

赵氏一瓢春轩

斋居如壶迥非人间傲睨太虚心超古先霁月光风湛然天真维赵颜子一瓢之春

顾仲瑛栖禅小象

猗与若人青年伟才斗鸡长乐走马章台归来丘园高风绝尘冥栖遠蹈唯务光是伦矫矫虎龙风云翕从陈情退避于北山中中岁慕道阅经律论员颅方袍指心见性有一成有宅一区壶觞图史足以自娱云山苍苍松籁谡谡云台炯然不假模貌

耕学斋诗集卷一

●钦定四库全书

耕学斋诗集卷二

(明)袁华 撰

○古乐府

塞下曲

积雪深没胫銜枚夜出關奇兵分三道已夺纥干山

杂言

君心如皦日妾心似明月永愿承清光繫须叹圓缺

采菱曲

兰舟荡湖阴采菱湖水深愿持花作鉴为照阿侬心

凉夜曲

玉枕木犀床桃笙截翠方鸟啼惊梦觉凉月下回廊

木有虫

木有虫声簌簌啮木为粮穴木为屋风雨不漂摇淫淫饱淹育兽罹网罗鱼毒食饵
木中之乐那可拟尔虫慎勿使穴穿穴穿身露集蝼蚁啄木飞来不贲汝

黄鹄曲（送朱某之胶州乃祖清开海漕）

黄鹄兮黄鹄金衣兮鞠裳衔粟渡海致帝乡有雏有雏羽翼长曾随凤凰集明堂晓
栖上林树暮下建章宫俯视燕雀枪榆枋高飞遠举天门翔天门翔羽肃肃吁嗟乎黄鹄

春夜乐（次韵铁崖先生）

蟠螭歛焰兰缸红神仙小女乘青龙凤麟胶丝光莹蜡雁泣骊珠落银甲弯刀截肪
五鼎烹紫微露泻玻璃罥双莲飞觴左右行感君恩重甘结缨红玉花房璫柱锦帷屏
暖春为主天鸡喔喔鸠唤妇黎云散作巫阳雨

莺啼曲

曲尘波点杨花雪红褪蔷薇众芳歇晓风寒透越罗裳离鸾孤舞瑶台月牕外一声
黄栗留綠阴如海树楼楼嫁得萧郎轻遠别千金结客帝王州前年郎去莺出谷去年书
来客巴蜀莺啼花落又今年鴈柱愁调合欢曲黄蜂蜜满莺哺儿莺莺随母迁高枝愿郎
作官向京兆归听莺声亲画眉

游仙词（寿铁崖先生）

铁崖启灵秀紫虚植仙宗啸咏登太霞八鸾韵雌雌东华命考籍玉检芝泥封飞行
帝青上云车扶苍龙

杨君金庭彦按部昆仑丘左揽凤凰轡前驱龙虎辀轰雷歎小鐵河倾汉西流下视臭腐輩尸行不知休

九华有真妃乃是安欝嫔学真龟台馆擢秀牛河津丹章闕神虎餐霞啜日根飙轮宴七景云轡蹑三辰下迈杨君家冥分缔良姻既忻对景好夙契心所亲奚必轻中接尘劳穆七神

西池蟠桃子一实三千年翠羽衔璫花双飞凌紫烟阿母启玉齿笑頤老鐵仙鐵仙青藜精主司文昌权不比狡狯儿滑稽称世贤

杨柳枝（送蘓彦刚奉母入汴）

杨柳枝春江曲千缕万缕摇新綠柔条不解系兰桡相逐游丝向天北儿郎去未归数徧江头树忧心如摇旌县县逐飞絮絮飞叶成阴犹能庇本根嗟彼遠行子胡为不思亲枝上灵禽噪晴昼鹤髮倚门屡搔首彩衣南归拜堂下持觴起舞歌杨柳母乐泄泄子乐融融不比杨柳枝零落同秋蓬母子欢乐情无终呜呼母子欢乐情无终

捣衣曲

凉风被疏桐一叶下井干夜气彻虛宇露华凝微寒耿耿修月光流晖入重阑中宵抱孤影晤昧发永叹良人遠行迈守边向三韩眷兹秋冬交感时不遑安含嘵理篋笥纫补在苟完层波展东绢积雪明齐纨霜砧迭逸响余音彻云端粉题流素汗鴈足焚膏兰擗针秉刀尺剪裁心凄酸县知肥瘠何想象缝中单制成遠寄将缄封涕汎瀾愿酬报国心努力勤加餐

河之水

河之水流弥弥出昆仑导熊耳踰龙门激吕梁吾不知其几千里但见浊浪溷溷东驰入海日夜去不已奔湍水瀲瀲断岸石磈礧北风扬沙双目眴一夫操舟众夫檣长年百丈上急洪十步趋前九步止蒲伏力争磨旋蚁戯马台倾进履桥圯芒砀云飞大风起汉楚英雄俱已矣吾闻千年一清圣人生圣人临御河当清河之清万方寧万方寧歌升平

驱车篇（送瞿惠夫镇江学录）

驱车声辚辚驾言适朱方扬旌羽旗翠橐弓戢在房褰帷览河山飞盖度康庄行矣
阐文化天子正当阳

西北有高楼

西北有高楼飞甍与云浮晓寅旸谷日暮挹昆仑秋仙子下黄鹄美人行玉舟紫鸾
双度曲凉月在帘钩

门有车马行

门有车马客绣毂夹朱轮玉鞍光之路翠盖影摇春高堂翼翼云承宇燕蹴飞花落
红雨升堂酌酒寿翁媪吴娃歌歛楚女舞愿翁多子仁且武执戟明光奉明主明珠白璧
安足数

骢马驱

公子驱骢马趋朝非冶盘金装鹿卢剑玉刻镂衡鞍晓刷沧溟上暮秣燕云端万里
起跬步那知行路难

清秋曲（次许彦温都司韵）

风雨满城生薄寒琐窗乌啼夜将阑深闺惊秋思寄遼金刀玉尺裁中单烽埃涨天
白日暗坐使綠鬢成凋残良人戍边归未得长林萧萧枫叶干

金屏曲（次顧玉山韵）

蜀丝步障围雀屏铜盘腻蜡光晶荧云旗翻月招湘灵兰芽玉苗春娉婷寶钗翠滑
欹双燕鹄别鸾离诉恩怨璫卮血渍燕支片牵挽飞光为花劝青蛇电掣星流虹鲸吐鳌
掷趋羣龙治郎断缨灭银烛肉台碎触连枝玉海尘愁吹桃李容洗妆并入华清宫罗衣
蝉翼绣芙蓉粉汗红香飘蕙风珎珠撒地谁先拾露寒铜掌金人泣芳卿寄谢无踪迹东
方煌煌太白出

小柳词（为鐵崖先生赋）

小柳十三余临池解学书扇描金孔雀水滴玉蟾蜍（右一）

半臂芦花白中单杏子红恼公何限思春水画桥东（右二）

解制乌纱帽能唱白铜鞮飞花虽作雪密叶自成蹊（右三）

度得嬉春曲金笼语雪衣不同双燕子去逐野莺飞（右四）

洞庭三万顷君山一点青道人横笛过独许柳枝听（右五）

独酌謠

晋王敦宋王安石不饮人以奸邪目之淮海秦约作独酌謠邀予同赋故及之

独酌一壶酒独酌乐天真又何须撞锤击鼓秦讴赵舞列鼎坐重茵天地作蘧庐日月为户牖阴阳作朋造化为友不愿白玉县腰间不愿黄金系肘后但愿年丰四海清日月沉醉无何有独酌有真趣可惜少知音清风明月蛙鼓吹仰天浮白呜呜吟独酌诚可乐抚事愁弥深长歌拔剑舞浑脱壮气激越秋阴阴君不见东家积钱与斗齐美人如花白玉题一朝祸起口仰药红颜散作他人妻悔不日日独酌三千卮又不见王敦不饮恺杀婢安石固辞司马醉万古垂名在简编酒边已蓄奸邪意

花游曲（次韵鐵崖先生招张贞居游石湖）

暖云霏雾摇空蒙游丝弱絮萦柔风木兰载春石湖里呼弄璫英掬春水鐵龙飞霜招羨门鸾旌小队青霓裙凌波双飞动尘步冶情漫忆鸳鸯墓蹋春挝鼓能几来便须一饮三千杯血色蒲桃凝冰盈鬱轮袍催紫檀板云旗缥缈青鸟西口衔红巾缄旧题璫林宴中探花使骰子逡巡赐绯四醉携红袖寫银笺不数公子花游篇

龙王嫁女词

海霞蒸红电光紫洞庭女嫁泾阳子帝将鳞车三百两阿香驱雷投双鲤冷光青荧紫贝阙玉绡泪染鲛珠血天瓢翻鬱白马嘶合欢杯吸鲸波竭儿郎烧尾负山走神龟持书报鬚叟鱼鳞屋深人未知珊瑚钩系湖边柳

织锦曲

绣帐锦流蘋畫閣金琅珰短机未成匹愁隨秋夜長彩鳳銜梭動纖體萬葉千花勞素指海枯石烂此心存比翼相栖木連理

鸡鸣篇

素魄欲墜地启明初上天攬衣出门望鸡鳴高树顛一声海色动載啼朱斗旋三唱
车既牽征途何渺绵喈喈复胶胶去騎何聰翩車中者谁子东吴美少年读书碧窗夜起
舞淡幽玄岂效五陵俠金距斗东阡行行向何許言往钟山墻金马云中聳苍龍阙角懸
鸡人起呼旦待漏禁門前矯首思君子長哦風雨篇

吴依謡

四座且勿喧听我歌吴侬二月春澹淹桃杏连村红壺酒操豚蹠太守出劝农所忻
风雨时击壤歌屡丰榆火发新燧柳烟散轻风条依墙下桑浸侬水中穜穀雨侬播种盈
畴綠葺葺四月五月交移秧向田中手龟指流血壁立环堵空野菜杂糠粃饥肠岂能充
八月官仓开新穀不得春晚禾穗离离大风来自东摇落满区亩太息心忡忡收获将上
场伍长追呼忙荷锄携畚壼何暇别耶娘言开白茅港兼程冒严霜州官点侬名里正与
侬粮夜投草中宿重趼脚成疮痍爽起负土夜继灯烛光千夫百夫长程度施鞭榜里胥
至侬家催粮入官仓况无弟与兄有米不得将吞声语哽咽独立野彷徨朝行河堤上暮
宿河堤傍堤傍泥渐高所积如山冈侬力日已疲河水日可航古者兵出农耕战固其常
屯成种黍稌实作侬保鄣侬来敢生怨侬謡遂成章侬愿干戈息四海为边疆销兵作钱
镈老作太平氓

端阳曲（次许彦温都司韵）

兰汤试浴铜龙吐美人 ■ 〈彭上委下〉 ■ 〈彭上隋下〉 钗悬虎竹粉吹香扑燕
泥猩红血点流花雨绛纱笼肉蝉翼轻木难络臂如珠樱赤灵符佩练囊小宛转中鎖相
思情镇东大阅临细柳甲光照曜狻猊口金仆姑穿杨叶飞帳下酣呼急传酒鑑輿北狩
龙沙长橐它鼓鸣白日凉侍臣万寿献天子紫霞玉醴浮昌阳

瑞莲曲（为海虞赵实甫昆仲赋）

- 10 -

芙蓉花并蒂芳皎若嬴氏女双骑紫鳳凌风翔赵家好兄弟颜色似花美惻惻同袍念肯逐秋霜委露叶淨如拭照映罗衫色双花衰荣自有时白头弟兄难再得

小游仙

青旄节卫翠云輶按部东行过赤城龙女遗珠鸡卵大结为双佩赐方平

发轫朝从麌凤洲五城弭节宿昆丘萧郎吹得参差玉更约飞璫十二楼

鸾胎麝脯侑璫卮五色云旗阿母期树上蟠桃如斗大休令狡狯小儿知

楼观岧峣白玉京云房中有董双成璫浆百斛那解饮要学从箫作凤鸣

帝京篇

金陵佳丽地神京巍峨帝车环紫极阁道近银河日上觚棱迴云生象魏多五侯车接轡七贵骑鸣珂柳湿乌衣雨花明太液波曲台新讲礼秘监旧书戈蜀郡王褒起梁园枚乘过得贤陈雅颂平虜进饶歌太史金为匱司仪翠飾礼成蒙顧问簪笔立鸾坡

泛舟橫大江

之子遠行迈泛舟橫大江日华动兰桨山色上篷牕遐覽意有在壯游心未降手挥如意一腰佩玉环双临流莫嗟逝锦衣还故乡

捣衣篇（送史仲先遊淮东）

碧梧叶落黄鞠开边风萧萧鸿鴈来夫君结客向淮楚无衣御寒良可哀强将垢敝和灰澣湖澣临流呼女伴双杵捣砧空外鸣寧憊手龟筋力悞火然金斗熨帖平纫针补缀对短檠归期迟速未易卜縗长緝短劳经营明年四月蚕上薄繅丝盈车手亲络香罗断机白雪明裁作春衣寄郎着郎无厌故惟尚新新衣故衣皆妾纫笑看墙角砧杵弃郎衣锦袍归拜亲郎衣锦袍归拜亲有金不戯桑间人

游僊词（次韵）

金色鸟啼若木东弱流沉羽直疑空飙轮不用青鸾御万里飞行一瞬中

贝阙瑶台护绛云玉阶露气晓綯缊真妃去校东华籍缝络明珠火瀚帑

一尘隔断圣凡分飞步何烦倩铁君雍伯俗縁犹未絕尚携王子去耕云

西池燕罢玉桃春新制龙绡稳称身欲借胎仙三百骑众中谁是卫夫人

曾从子晋客金庭洞室岩居已遍经授得餐霞轻举术清斋底用觅芝苓

长爪灵姝身姓麻饭炊巨胜酌松花蓬莱三见波清浅尽诧芳年始破瓜

斋房夜降九华仙异域香婴一缕然写竟丹章题锦轴玉清神虎内真篇

坐骑赤鲤挟琴高璫玉新治小并桃笑指积金峯下路醉吹尺八听松涛

神仙鳌负过西瀛万里洪波顷刻清使物主方咸不验却怜汉武事文成

冥缘夙契接佳期慚愧西成是我师碧柰花开青鸟语洞房相对坐弹棋

紫荆曲（有序）

予友费君舜臣其曾祖父荣敏公大父江夏侯父宣城君皆著名当代宣城君宦游西江舜臣尝学礼于余复卿先生之门遂脱去狗马纨绔之习名声藉甚荐绅闻生二子子壮各有室一旦分财异居君叹曰不能教以义方者我之责也呼三子立堂下而诏之曰夫木由萌蘖以干云霄本之固也水由涓流以汇湖海源之深也然本拨则枝枯源涸则流竭此理势之必然若不闻田氏之紫荆树乎三子乃幡然悔过复同居以事君如初汝阳袁华为制紫荆曲三章以为费君寿云

紫荆树花离离光荣何芬敷雨露之所滋百年茏葱翠羽盖费家子孙培植之

紫荆树叶翳翳根既拔叶乃悴费家兄弟复同居华鄂相辉似唐棣

紫荆树枯复荣华开韡韡当中庭折华起舞寿双亲懿哉费家之弟兄

春草词

泉南陈彦廉氏少孤作堂奉其母庄以居名之曰春草为赋春草词六解

堂上彩衣斑戲舞娱亲颜俯看堂下草生意待春还（右一）

春还芳草碧子长赖母力草色有枯荣母恩无终极（右二）

严霜催老干弱蔓缘孤根春至清阴满难酬雨露恩（右三）

薰风被荃葛儿衣袗綿綿一缕与一丝咸自母手绩（右四）

既无池塘梦肯作王孙游愿身化为草根叶镇相繆（右五）

主妇能调饍升堂具旨甘草蔬郎自饭举案对宜男（右六）

蹋踰篇

冶家儿女髻偏梳教坊出入不受呼蹙金小韁飞双鳬飞双鳬曳双袂玉围腰珠络臂

柳风吹云袞香绵六银绣花明月圆湘波盈盈动金莲动金莲汗沾粟展鲛绡钏鸣玉

女郎娟娟柳腰肢锦文娇束金芙蓉玉纈团云倾紫丝倾紫丝婵罗袖蹴花心为郎寿

香轮小鞚戎葵丈官场蹋起齐青云彩结门县月为门月为门攢身过五花团天上墮

湖州竹枝词

月子湾湾照船头阿依听我唱湖州侬心不似双溪水纔出城东各自流

荷叶浦北菱湖东清溪曲曲与天通莫将鐵笛弄小海大风倒卷冯夷宫

黄姑浣花织锦衣留郎不住送郎归一色银河三万里手携石子是支机

汎波春涨腻如油坐看青山船倒流桃花欲开杏花落打鼓吹笛上杭州

西湖竹枝词

侬家少长住西泠门对里湖莲叶青妾心如藕丝不断郎意忽作随波萍

山上有山未还家日日望断金犊车湖阴剩种宜男草直待郎归始着花

南山起云北山阴暮暮朝朝晴未深公荷拳似小儿手虽不成莲已有心

昨夜忆郎开绮牕平湖月白水如江妾似两峯日相望纵有飞来不作双

耕学斋诗集卷二

●钦定四库全书

耕学斋诗集卷三

(明) 袁华 撰

○五言古诗

至正乙巳纪兴

炎精罹阨会新都肆奸偷窃权造符命居摄仿伊周甄阜主击断王邑叅谋猷杀子
堕三纲进女位长秋金匮授神禅即真成篡谋民心本思汉天意终眷刘二八火为主龙
奋南阳秋发兵捕不道前骑驱旄头一鼓入长安尚阻渐台流周还威斗柄按式审休囚
传首诣宛下黔黎起歌讴帝王有真数智力焉能求区区事譖詐万古徒贻羞

扬雄莽大夫陶潜晋处士校书天禄阁归耕柴桑里陶情綠酒倾準易太玄拟文章
既雄世出处多殊轨直书义自见珍重子朱子

朱楼临大道畫戟列高门问是谁人第疏封两国尊任侠若孟公养士拟平原客跋
明珠履宰腑封熊蹯长儿尚公主中子守名藩睥睨仇雠报诛求乡里怨一朝被流放不得
窥田园富贵如浮云飘散岂常存阶有蒿莱长门无车马喧鸺鹠鸣废井鼯鼠上颓垣
豪华易凋歇往事那可论空余乞墦者犹是侠王孙

闾阎轻薄儿掉臂起乱离捐生取功名徇财忘险巇鱼丽朝结陈肉薄夜登陴论功
秉节钺干城罗虎貔玉刻鹿卢剑翠织蝥弧旗燕马饱刍豆韩卢厌肉糜晏安懷酙毒富
贵履危机飞言起不测车裂徇其尸空令行路人感慨兴嗟咨所以昌黎翁为赋召南诗

城西有冶女被服何姗姗白玉搔头凤黄金■〈勺外盍内〉鬟蝉肌肤若冰雪标
格拟神仙不闻傅姆教自择心所怜侠遊者谁子东家恶少年椎埋白日内剽击大道边
目成如宿约窃出夜私奔托身不分明色衰中弃捐男儿慎出处景行当勉旃贞哉宿瘤
女千古称其贤

苍龙何煌煌芒角在东方感时耿无寐起视夜未央晨兴粪田畴洒流固堤防穀雨
扇条风负耒欲分秧立苗本欲疏薅鉏莠与稂耕耘不卤莽所报千斯仓岂惟田畯喜妇
子亦洋洋严霜降中野黍稌登圃场上当输国赋下以充糇粮于斯祀先农击鲜罗酒浆
饮福既赐胙再拜奉亲尝愿亲弥寿考黄耇膺天庆

嚶嚶黄鸟鸣莫莫柔桑勦行行抱懿筐掺掺出素手长条手难扳卑枝钩可取摘迟
蚕苦饥姑嫜望来久惟愿茧如山缫丝易升斗号寒固未免输官安敢后输官庶有余染
丝作长绶萧闕夫戍还黄金印县肘

燕燕羽差池双飞复双止朝从旧主归暮将旧巢理巢完乳我雏寧辞污泥滓雄飞
去不返雏长各他徙孤鸣芹塘中独宿杏梁里蒲柳风淒淒蒹葭露泥泥红缕系将离
彼玉京氏别来隔黄垆飞投墓门死禽鸟尚有知人胡不循礼

夭夭原上桃濯濯园中柳商飙飒然至荣华变衰朽青年不努力白髮倏盈首身后
千载名生前一杯酒归与东曹掾还为莼鲈否

人生居世间弱草栖轻尘胡为事微利汨汨疲精神牙筹较锱铢会计夜達晨黄金积成埒焉能葆吾真题湊锢三泉橐裡亦掩身贵贱同一死感慨为酸辛不同草木腐予懷古其人

过张子英闲止斋阅法书名畫

步出甘泉坊始得闲止斋虽迫市中杂颇惬意者懷阅架发古秘展玩心所谐方忻
昼晷永适际风日佳疏花鄂韡韡好鸟鸣喈喈回策古城隅从祠临水涯乔木暝烟合遥
峰夕岚霾寤歌遂成章聊以慰离乖

郊居

郊居旭旦草木发华妍沃壤润含雨芳林澹浮烟飞鸣变新声游泳戲清涟所忻
气候和那计節序迁逍遙城阙中放浪江浦边晓从铁塘去暮向樊邨还上懷舞雩咏下
拟归田篇宴安古所戒躬耕乐天年

野航轩雅集分韵得秋字

今日有佳景野航俯清姿酒从碧筩泻烟向博山浮长林树阴密方池水气秋蝉依
疎叶语鱼唼落花游睽离获良覩飞光为迟留

题金人校猎图

朔风吹惊沙桦林叶斓斓兽肥马骁雄校猎出天山晓踰黃龙塞暮过居庸關猝弓
金仆姑寶刀龙爵镮鶯鹅天际落小队碛边还

题顧玉山摘阮小像

夫君青云姿逍遙在丘园冥心絕遐想燕坐息众喧摊书白石上摘阮青松根乃非
竹林叟似是醴陵孙

题顧玉山读道书小像

灵岳耸层霄璫馆开金乡若人秉昭质守一修洞房呼吸龙虎气嗽咽日月芒龟阙

西瑶台中有明光章下授小兆臣玉检鸾回翔稽首校隱文琅函耀霞光绎蕉承寶露肉芝冒玄霜采掇充服食味倾金梨浆逍遙澹无为寿期穹壤长

宿承天寺方丈分韵得深字

朝游双峨阳暮宿雪堂阴月落踈钟度霜寒清夜深谈玄析奥义观妙征素心白业
傥可修攢眉重相寻

赋得江上女

荪桡送桂旌沿洄多冶情扳条约翠袖掬水弄璠英清吹随风度纖腰束素明家居
白下里夫戍洛阳城明光朝执戟细柳夜分营许国承恩重忘归念妾轻贞心似江水朝夕向东倾

题松崖圖

青山上无极白云冠其颠旭日照高林丹碧何鲜妍中有学仙者冥栖遗世缘天风鼓海涛和以朱丝弦斷苓采白石汲涧煮清泉挥手谢时人飞行凌紫烟

嘉树轩分韵得报字

舣舟绰山阳重湖水澄浩百年植嘉树森列若旌纛兹乱心曲触景起哀悼酌泉荐苹蘩再拜酌神道嗟哉抚育恩罔极何以报顧瞻白云飞回翔复高蹈散策日未昏微懷寄幽讨

题丘克庄敬云楼

层楼照宏敞大泽起綱緼容容上承宇靄靄度微芬思亲惜流景懷土念离羣拄笏延清赏西山未夕曛

寄顧玉山

穷櫨坐风雨泥涂寡来辀曲生不我即何以寬离忧梧桐渐凋落蟄虫尚喧啾感时发长叹懷人动遐愁空持菊花咏怅望楚天秋

题张复初所藏倪云林畫

春草蔼碧色春泉流白云时觅渔樵侣行穿麋鹿羣覽古发长啸寻幽探秘文娟娟
双径月流景照夫君

秋夜懷友

玉露洗空碧银潢澹无波懷人起遐想况兹良夜何俯听百虫泣仰观众星多惊鸟
未遑息飞鸣择从柯中心百感集岂谓悲蹉跎终羨林居子躬耕乐太和

东皋隱居集陶诗

少无适俗韵山泽久见招结庐在人境种苗在东皋披榛步荒墟晨出肆微劳坐止
高荫下我行岂不遥绕屋树扶疏敛襟独逍遙涉暑惊秋霜寒风拂枯条时驶不可稽浊
酒且自陶提壺挂寒柯聊以咏今朝

世短意常多久去山泽游草庐寄穷巷嘉穗养南畴淒淒风露支司田眷有秋我实
幽居士终懷在归舟有客赏我趣引满更献酬菊为制颓龄酒云消百忧至德冠邦闾自
古有黔娄

宿白莲寺桂子轩分韵得月字

幽夐阿兰若逍遙谢城阙池回白莲风林堕青桂月语深玄理释心清妙香发道人
澹无为悠然思超忽

楼上观荡舟妇

蕙楼临广甸兰塘通曲湖山光落乌几水影上虾须荡桨谁家子轻舟迅若鳬扳莲
觅嘉藕剥芡弄明珠送嚮情婉娈卖眼意踟蹰姑嫜在堂上返照下桑榆

春晖楼前玉绣球十月试花

中园有嘉植凌寒开一枝粉香飘玉质霜气薄瓈肌岂愁冰雪妬应负燕莺期彷彿

唐昌观依稀后土祠抚时惊节序对酒念睽离太息风尘际看花慰所思

半月池

灵源发龙泓渊停湛空碧影斜瑶台镜气压桥门壁蜿蜒菖蒲根赑屃蛟龙迹相期
学仙徒握手弄云液

赋得馆娃宫送友人之武冈城步巡检

驱车阊阖门息驾灵岩下灵岩信清丽维兹馆娃所稚子停宵征于焉同览古夫差
昔好奢筑宫置歌舞璇题丽层霄丹碧耀平楚藻幄曳华幔妒宠争媚妩采香朝舣舟响
屢暮清暑代谢人事迁商飙动禾黍俛懷諸宮勝亦復一丘土不作楚囚悲將軍本雄武

题赵仲穆兰

窈窕楚皋女委蛇佩陆离凌风翳翠袖乘月靡云旗含嚦嘿延伫怊怅失佳期涉江
采璫芳将以遗所思

高人养冲素絕粒栖璫林游盼瑤华圃珥节阆风岑手持碧玉苗幽香散烦襟相思
不可见落日楚江阴

送张子正谒选赴都

巍峩鵠鵠观岩堦凤凰城衣冠列劍佩龙蛇动旗旌碧涨御沟水声啼上林莺覩物
写情思无媿水曹名

次韵答秦文仲

晨兴谢嚣杂晞髮坐广庭零露泫从条初日薄东荣矫首懷友生惻怆难为情有酒
但斟酌莫嗟年运倾

桐川秋夕

驱车复驱车驾言适他乡他乡非故里相知邈何方败叶鸣寒蛩素月流空房仰视

河汉高安得凌风翔商飙下木叶游子寒无衣山川良阻修岁暮胡不归目送孤飞鸿羽翼未有依愿言守真素毋劳歌式微

史仲先梅雪斋

穷冬霜露繁坚冰凝大泽微阳地底回区萌将甲拆斋居观物化光集飞囊白踈梅若高士空谷聊自适操行雪比洁倾盖成莫逆峩冠柱下史晤对成三益交谊矢弗渝惟感流光易永订岁寒盟忠诚着金石

夜宿福聚兰若

白露被众草炎歊顿消歇散步入重闕斜晖薄林樾萧然古兰若幽邃类岩穴同心偶相集论议何锋发仰观河汉高清光流素月秋毫粲可数隱见白玉阙徘徊广庭迴涼飙肃毛骨茗饮消渴吻野蔌错肴核有客仅七人无酒行百罚庸僧太俗恶决去兽惊犹眷予坐最深吴霜点须髮衰病目偏盲材涩思枯渴多君儒林英词源浩溟渤机锦织流黄佩玉刻剞劂或吟行徐徐或寐坐兀兀人生百年内流光嗟倏忽雄文屹巨碑富贵等灭没始问平泉树何如首阳蕨努力树勲业毋为事汨汨

送钱達善之京师

白露溥鞠蘂凉飙拂桂枝蕭条平原上黍稌何离离夫君戒行李抚景动遐思山川气鬱葱江河路委蛇青年事铅椠说礼敦诗书韬钤秘虎豹奇正分熊罴仰企前哲学节义矢弗亏行矣保令名黃耆以为期

日夕佳轩（集陶诗）

养真衡茅下好爵吾不荣榆柳荫后园幽兰生前庭神渊寫时雨相命肆农耕虛室絕尘想气彻天宇明凉风起将夕归鸟趋林鸣班荆坐松下杯尽壶自倾念之动中懷千载有余情

仲春释奠燕集存道斋分韵得天字

于穆素王庙层构何岿然时维中春月释奠加豆笾牲尊酌醴齐鸾刀割牲牷陟降礼有序对越神在天竣事既彻俎朝噭曜芳鲜坛杏炫积雪池藻扬轻涟鲁叟圣人胄幽

斋肆方筵献酬仪秩秩论辨言便便浩唱发清响希声寄朱弦明时崇礼乐安车政征贤

题观泉图

寒泉落幽涧絕壁凌长松之子逍遙游遐觀意从容俯嗟逝水駛仰企高山重蒼头
亦解事攬杖以相从

送章生海州吏

微风动苹末木落海乡秋冥鸿戾层霄轻桡泝中流泝流向何许淮水东悠悠青年
不择禄高堂亲白头万里起顷步前途遐且修勿云刀笔贱请视汉廷侯

嘉树轩

双槐何亭亭交柯荫华轩昔人去已遠手植今犹存寶露流层颠醴泉灌灵根枝叶
日以茂子孙日以蕃愿同紫荆树永保矢弗谖

梦鹤轩为殷之秀赋

琳宫肃弘敞华馆通曲密萝月白纷纷竹风清瑟瑟至人本无梦恬澹志专一頤然
羽衣仙胡造规中室同作钧天游飞行周八极蝶化漆园吏蚁聚槐安国斯理倘能求至
道谅可得

万竹亭高士图

参差万玉立窈窕一亭深不改冰霜操时聆鸾凤音数等零陵石诗同淇澳吟頤然
二高士允若双南金临川嗟逝水焚香弦素琴昔贤不复作慨想豁冲襟

云松巢为定之赋

结巢云松里幽闲意颇浓松声发灵籟云气矫游龙采拾聊可养持赠愧无踪何当
解尘鞅跨鹤以相从

送葛进善游京师

黄鸟出谷鸣春阳被郊墟游子观国光薄言驾轻车龙虎势盘踞回合抱帝居先下
郦生揖次陈贾谊书献纳趋金马校雠登石渠翻怜冯暖辈弹铗叹无鱼

溪山读书图

溪山读书处衡宇窈且深白云起层巔嘉禾秀繁阴缅懷郑谷耕时为梁甫吟斯人
不可见挂笏对遥岑

安素斋

吴淞何渺漫朝夕流不已上有嘉树林层轩俯江沚之人乐恬澹脱略纨与绮素履
既坦坦安之良有以考祥保贞吉守默忘贱耻冯高时引望春还景妍美修篁拂踈棂垂
杨荫清泚何当一造门谈妙析玄理

竹林高士图

淇澳水弥弥淇园竹猗猗有斐古君子燕坐淇之涯横琴未暇弹悠然有遐思兴懷
仰高躅三复卫风诗

送人归杭

春水满南国樱桃花未红兰舟冲雪去家在玉峯东青山当屋角綠树覆庭中可怜
兵燹后化为蒿棘丛感时心耿耿话别意忡忡林栖傥相忆题字送归鸿

寄逸闲叟

义天求法地楼阁倚孱颜忆得旧游日鸟鸣春树间行循惠山涧坐对玉岑山逸师
既卓锡谈玄觉冥顽室飞花似雨洞鎖铁为關安能脱尘鞅卜居相往还

赋得昆山送蔡广文

之子驾言迈春览昆丘颠锤秀自前古著名由昔贤昔贤去已遠茲山还岿然玉气
润凝雨鹤声清闻天遥思解组日何如入洛年献纳有余暇为续昆山编

次韵奉答印月潭讲师

炯然摩尼殊照彼圆觉海万恠形靡逃连城价可待夜光烛苍冥歛耿不改上人心若珠随方见五彩流通既无着幻化焉能浼勗尔崇令德优游乐寿岂

斥鷁抢榆枋大鹏抟瀚海所以莘门士养志固有待贞心如皦日岂为穷達改白驹不受絷少微自扬彩大节苟弗渝微名岂足浼愿遂鸡黍期共挹南风岂

寄费舜臣印月潭

户有读书声门多车辙迹丈夫岂长贫一椽聊止息草深蛙鸣池苔滋蜗篆壁俯怜东逝波仰羨南飞翼会心不在遠佳处輒终日玉子落文枰锦囊出缃帙相过南山僧戒律谨三尺何如尉迟子酒肉破孤寂

原隰何畇畇华木亦莽莽深村寡轮鞅居民乐生聚水芝纔着花莎鸡又振羽去日尚能推来日讵可数晷景嗟荏苒质性念椎鲁何如证无生趺坐不出户

達人贵闻道仕士重守边胡为事一室四序从推迁春花碧色敷夏木清阴圓草木亦有时力田尚逢年嗟余濩落材兀兀理残编丈夫慎出处岂为利禄牵荣名若春花飘散随风烟疏雨过郊墟水竹生华妍缅懷靖节翁遇酒輒陶然过溪成大笑此理谁能宣

游永寿寺谒和义王祠复过兴福月潭讲师丈室

秋原聊引望野涉自成趣意循洲渚转目送江波注柳飕凉拂衣稻露香沾履欲作招提游已办济胜具寻幽趋遠林习静得佳处丹碧何焜煌楼观出高树繁昔和义王奋身应君募锡封列茅土勋业垂竹素有子味禅悦建寺慰思慕先祠南庑下象设肃徒御雄姿俨若生朱衣佩寶璐缅懷襄樊日酣战挥白羽宋室已不竞皮去毛安傅頤瞻徘徊久秋阳薄沮洳回策过讲台蒿莱没行路丈室仅如斗虚空寶花雨上人除结习缤纷自飞去回睇祥峯闲暖暖隔烟雾予以纪兹行咿唔遂成句

送彭从龙归清江迎妇

游子驾言迈驱车楚山阿积雪明高林落日照大河瞻兹川涂长况值岁暮何相送

复相思看云动悲歌

朝阳有威凤排云九天来晓仪瀛海上暮落岐山隈
览德时一下明良位三台还从嬴家女吹箫向层台

轻烟林际开素月川上起桂楫击空明消摇泛容与
美人隔秋水相望不得语临流折芳馨所思在遗汝

溪上桃始花溪流净无沙偶得胡麻饭穷源路忘赊
楼观五色烟中有綠萼华乞与续弦胶相期凌紫霞

鹤巢为龙虎赵伯容赋

野鹤龙虎至故巢凤凰颠故巢破勿理新巢小于拳修颈高结喉玄裳何蹁跹晓栖
三株树夕餐五色烟左盼紫虚君右揖浮丘仙啸歌空洞章览景升上玄缅懷尘外踪归
来是何年

追赋玉蕊亭小集分韵得溪字

华灯照高宴方舟溯回溪道里虽阻遠何期冠盖齐青阳动林莽积雪润涂泥行酒
玉蕊妥放歌碧云低会合谅有定追赋慰离睽伯容宋福王孙

松林高士图

层波荡晴旭长松落清阴曳杖者谁子逍遥散冲襟野芳发幽香覽古动遐吟美人
不可见相望楚江浔

寄题袁仲傅綠筠轩

吾宗有高士种竹封禺颠交柯承寶露密叶荫璫泉消摇葛陂杖咏歌淇澳篇傥骑
茅龙去为我谢辛饼

玉山草堂分韵得縗字

草堂秋气肃清唱送觥船微风下高树华月丽中天雄辩酬支遁吟诗懷惠连惊鸟
栖择木流萤低度川抚时情悒悒感旧意悬独念玉山子冥心息众緣

赋得泰伯庙送郑同夫归豫章

巍巍三让庙乃在古城阿日月明袞裳殿陛列碉戈万世尊至德遗风亘不磨送君
庙下路吴江秋水波

溪西草堂

旭日出溪东光照溪西屋屋中何所有牙籤县玉轴门当五株柳窻立万竿竹归与
絕奔竟俛尔乐幽独一笑歌濯缨溪水清可掬

赠史君美为黃云卿赋

娄有史君子分甘草泽居昔曾青城游袖秘玉函书质性既厚朴幼懷乡曲誉牽牛
朝出耕蕭艾手自鉏野藿香可美篱鞠味堪菹吾友大黃君一病半夏余维子多遠志从
容駕軒车剖決明表里调剂气旋蘊魄乏明珠报长歌酒频酬征鸿行当归微阳起石渠
相思子不见扳桂下庭除

游鴛鴦湖分韵得落字

寂寞虛斋静泛览方舟乐大堤橫卧虹飞杠高渡鹊川阴云气生水阔天光落荒苔
积寶园壞垒鸣金櫼余生感櫓散抚景嗟离索行觴藉草饮斜阳下林薄

寿寧庵夜宿

偶成绰山游西风吹落日大田登禾黍高林收枣栗仰羨松栢姿俯慚蒲柳质石县
王果崖花雨维摩室白云浮茗瓯缥囊散书帙抚事困诛求拯时之经术纷争若集药名
蝼蚁相持如蚌鹬可怜鵠吓鼠何异裈处虱郊居便樵蘿野服忘巾栉独乐五亩园素封
千树橘被酒坐逃禅铭墓亲操笔梦幻前后身道悟中边蜜剧谈更抵掌展席仍促膝煌
煌斗回杓耿耿月离毕水声遠澎湃竹影互蒙密清坐不知疲东方启明出

楚云堂分韵得城字

霜露悴百草风埃闔重城冥鸿奋羽翰肃肃东南征感时增慨慷岂不懷友生美人
忻会面开觴掇秋英燕坐适清赏高梧含夕清厌厌乐未央明河渐西倾

次韵张贞居明静院莲社

东林白莲社明静今复建两峯如五老秀色互争献外史渊明徒高居乐贞遜入社
眉虽攢许饮心所愿西方九品华默想不在问何当解尘纓趺坐听高论

追赋芝云堂小集

窈窕玉山下楼观何委蛇丹葩曜阳林金粟缀谬枝感兹节序迁四筵乐芳时桂酒
倾凿落兰烟度罘罳双歌声袅袅屡舞影傲傲乐事古难并宿留阻深期何以慰所懷载
歌停云诗

二月十日西园对雪

舣舟东城阿张宴西园里遥天黯同云高轩落疏雨霏霏杂霰零冉冉微雪委先集
长洲苑乱点脂塘水蹴絮翻新燕吹花起潜鲤初飞势斜斜渐积光玼玼淒咽鸾笙涩徘徊
翠袖靡人生贵适意流行随所止底用银烛燃清光照窗几

芝云堂夜集分韵得相字

今夕复何夕张燕芝云堂西风度江汉仰见征鸿翔坐中仙释侣学道攻文章飘飘
鸾鹄姿皎皎金玉相上容貌苍古乃是李伯阳忆别昆丘颠十见木叶黄相逢玉山里语
旧热中肠促席更秉烛深杯送瑶浆酒阑登雪巢取琴弦清商一弹别鹤操再鼓凤求凰
人生会合难引满重举觴与子各尽醉忧乐俱两忘

赋得佳人晓妆

鸟啼琐牕曙薄寒犹中人彩服龙香炙玉台鸾镜陈体轻腰束素步细轞生尘洗妝
初敛笑握髮半含嚬柳叶邀郎画桃花倩妾匀蜂黃微点額猩血浅涂唇不畏秋娘妒那
愁飞燕嗔淑姿岂长好贞心终不泯愿为双紫绶纏绕向渠身

柳塘轩听雨与谢子兰同赋

忆昔西游时扬飄楚江船。颠风俄送雨洪涛怒掀天。飘摇芦渚外。滴沥篷牕边。如马
龁枯萁澎湃惊昼眠。北辕梁宋郊渡河上。幽燕穷冬雨载道。蹒跚行不前。暝投野店宿土
锉寒无烟卧听耿不寐。懷乡思悬悬。前年走乱离。穷途屡回遑。一月不见日。谁能补天穿
相对泣。妻孥所忧沟壑捐。间關戎馬中。幸获窺田园。剪春韭桃李东风妍。遥知江湖
夜孤灯嗟十年。有客毗陵来。阜帽霜盈颠。奔逃患难余。与予同可怜。岂无道里归饥火方
垂涎。主人敬爱客开尊。且留连。幽轩落疏雨。秋水满平川。余音散高柳似聆清商弦。剪烛
对床话中心。畅忧悽我还君未回语极重。凄然周汉终再昌。恩泽沛八埏。梯航四海通。归
钓槎头鷗呼儿。带经锄白鹤。溪之塲。异时倘相覓。毋忘聽雨篇。

耕学斋诗集卷三

●钦定四库全书

耕学斋诗集卷四

(明)袁华 撰

○古诗(五言)

述懷贈鍾安期

我游钱唐时始识种云叟。种云江夏姿意气倾牛斗。小閣瞰重湖掩映柳州柳。数过
南阳君高居宅其右。长身美丰标。清庙列樽卣。堂前两槐树薿薿叶硕茂。清言坐竟日。
炊黍剪春韭。极称安期生亹亹不絕口。前年往京师。同泛具区藪。传舍遂识君。倾盖若旧友。
舣舟垂虹侧。返照在户牖。鲙鲤烹鳧雁。张灯夜置酒。哀弦展清商。抚节歌击缶。间别情何
长。愧乏报璠玖。去年南阳归往劳。或恐后君至。我适来良会亦非偶。我留洪桥市。君宿南
屏阜。相过半舍余觴热。屡奔走。迫暮即下榻。瓜果杂野蔌。秉烛坐假寐。欲睡还掣肘。自言
上有亲龙钟及黄耆。下无应门儿。内乏主馈妇。干禄閩中郡。风埃面多垢。薄遂终养计。奄
焉失慈母。履霜悲风木。居庐岁时久。今年来婺江。访我意弥厚。睠兹春夏交。新綠暗林藪。
別君殊作恶。思君■〈蜀犬〉延首呼酒与君饮。中懷与君剖。昔如鷹脱韁。今若魚在罇。
北南屢遭回。龃龉动輒咎。長歌送君行。輾轉愈懷旧。种云已仙游。空室泉浏浏。南阳往。
泉南未省回。辕否相逢。倘問予。為言安■〈亩犬〉亩。

次韵云扉讲师游南山有懷张外史旧游

昔陪张外史蹑云上崔嵬前登风篁岭酌泉苍蘚堆后度麦冈重荒坟际蒿莱陵谷嗟变迁览兹良悲哉维时莫春初鸟乳声喧逐行循灵石涧坐觅翻经台万竹森玉立云扉絕纞埃杨氏椒房亲葬母此山隈想当全盛日轩盖如云来至今清壑亭金铺照莓苔行觞藉草饮蔬果杂樱梅赖彼二三子促席相延陪醉题素壁间辞翰粲琼瑰掩映房山咏光柱烛九垓骑鲸上天去化鹤何年回二妙不可作抚卷心孔哀

送张师允铨选江西

豫章古名郡上应翼轸躔山川互聯絡直与荆蛮连帝忧南服遠何以寄蕃宣相臣躬秉钺开府大江边甲兵洗瘴雨戈船清海烟黔黎含疮痍守令賴才贤考绩分殿最三载方起迁谒选诣阙下道里阻且绵廷议经济臣銜命出典铨张君庙廊器授节斧宸前轺车适楚越春花正芳妍奸贪宜屏黜廉慎属陶甄忆昨识君初乃在娄之塙别来六载余懷君思烦悽盜贼各已息径上官河船侧闻江淮间斗米钱三千爨骸易子食沟壑多弃捐遴选得循良庶可解倒悬黾勉王事毕彩衣舞蹁跹矧茲休明运获见忠孝全离别不足惜载歌皇华篇

次韵顾玉山感懷

金粟老禿翁喪女及二妇情鍾政我輩况尔中年后值兹世浊恶喧呶互紛揉達观了死生放浪无何有泛覽經律論一室仅如斗蒲团竹匡床趺坐各双肘心如大圆镜触处靡不受荣辱既俱忘恒欲烹走狗独怜孙与甥哀哀失慈母谁能断嗔爱毗耶有无垢所谈不二法究竟唯濡首宿业想未偿惊心血屡呕深秋天气暄桑柘叶黝黝念子筑杭城土石躬自负城高石易尽鞭捶无所取书来知近况黧面龟两手新穀幸登场日夜操杵臼悉供役夫养老稚曷餽口安得海宇清闢塞忘战守归耕对儿女畜鸡黍肥牡侧闻王师出鐵马渡河久中军霍嫖姚报国忠肝剖鼓行捣虎穴若拉枯共朽捷书尚未至西风又衰柳思之转鬱陶澆愁唯有酒兴亡信有数蛇断秦鹿走荷锸死使埋四郊多培塿

匡山五咏

看松阁

匡山何崕崕如拳突中央万松列岩岫天螭蛟龙翔若人抱贞节眄柯日徜徉微吟
息高荫燕坐弦清商茅屋三四楹萝翠友岚光谡谡灵籁响阴阳芳昼长采花酿秫米勗
苓充糇粮何殊陶贞白结楼居华阳

烟云万顷亭

英英白云飞弥漫被岩谷儻若大瀛海洪涛互起伏好风来自东流膏润山木揽之
不可得卷舒一何速危亭俯松杪冥搜入遐瞩灵物既深潜阴渊寒气肃有时出肤寸海
宇溥沾沃终乘游帝乡矫首谢尘俗

在上亭

众山皆部娄小亭立孱颜仰观逼霄汉俯视迷人寰一勺沧溟水数点瓯闽山朝暾
照涧谷红紫何斓斑兰荑苗石罅鞠丛冒溪湾芳林春夏交好鸟声关关醉骑黄鹄去笑
挟飞仙还朗吟莱公句高风谅能扳

清高亭

层峦壁亭北灵渊汇亭西野芳新绿合岩扉空翠迷林深不见日地迥惟闻鸡草木
气胶葛六月流冰澌達人逍遙游散策凌丹梯澄懷适野性观物和天倪易同醉侯讲诗
为应真题急流能勇退名与三高齐

环中亭

崇冈积苍雪罗立展屏嶂崿崿荦确中芟夷得平旷四顧何巍然镵云开迭嶂山如
众星列环拱皆北向一亭据中央势欲两相抗天高氣翳消春还淑气畅激水流羽觞鸣
琴发清唱俛仰宇宙间览古兴慨慨

送友人之明州卫

裔夷倭奴氏僻分带方东顽嚚罔率化不与中国通椎结斑斓衣习俗相剽攻轻生
蹈巨浸出没如熛风爰止崇明里掠虏肆奸凶桓桓张将军擐甲登蒙冲手中三尺劒紫
电明霜锋追北海门右杀戮无遗踪执俘仍献馘锡爵酬厥功拜命赤墀下进秩佐元戎
四明古句章海水青浮空山川既佳丽人物亦豪雄感别意惻惻懷古心忡忡南薰吹旆

旌小队罗刀弓长途驿马疾遠浦渚莲红勉旃同前烈策勲铭景锤

拜刘龙洲墓归饮清真观以龙洲先生遗墨分韵得何字

龙洲湖海士塗玉昆丘阿山川邈如昨乔木拱烟萝伟哉二三子览古发嘯歌披荆
吊遗迹窆石临嵯峨嘵嗟岁月流奈此湮沒何立阙表墓道大刻盘蛟鼉维时春载阳好
鸟鸣声和丽牲拜墓下冠盖相骈罗山僧出遗墨保护百年多纵横廿八字恍若龙腾梭
緝懷携巹酒风雨渡江沱中原虽在望泪落如悬河安得起九泉执手野婆娑归憩玄馆
夕涼风水微波诗成想丰采寤寐傥來过

书画舫小集送谢子兰过江东分韵得云字

曲馆众芳歇方塘西日曛曲阑杨柳树秋水白鹅羣谢公浮家隱囊盛惟典坟书畫
船自操子前中细君胡不归故里故里闔楚氛玉人张离筵高轩水沄沄翼若青翰舟泛
彼江之瀆扣舷歌少海问字客如云糾罚解载扬探题诗屡分君言适江东研田事耕耘
慙屈鸿鹄志组织云锦文蹇予风尘表孤陋寡所闻何日往从游骚坛策奇勲

自钱塘附漕舟泛海至石墩时至正乙亥嘉平廿三日

平生遠游履歷览名山川北上齐鲁境西泝荆襄船承平百年久關塞静风烟道里
不裹粮朝吴暮幽燕岂意戎马生跬步那可前揭来钱塘城雉堞云山连带甲三十万兵
革利且坚中军霍嫖姚智勇开三边井邑百战余白骨蒿萊纏粮道又梗阻故里难回遑
漕侯万人杰饟运来江塲仓皇间归路黄色眉间鲜太守敬爱客江亭祖离筵临行重赠
诗诗句清且妍暝投海门泊喧急鸣哀弦长星蚩尤旗光亘奎娄纏修德弭天变圣主方
求贤黎明众船开张旗鼓阗阗推篷视海色雪满羣峯颠峩峩天设险峽东崖倒悬英雄
已陈迹涛浪犹掀天尚余射潮箭钱筈大如椽扬颸出海口风静波涟漪雪霁天宇高眺
遠意所便甬东山数点跕跕若堕鸢潮汐既有程往来谁使然昔人去已遠此理何由宣
茲游信奇絕岂独坡翁专舟归石墩浦微涡生颊鬚戴星蹋沙尾借榻营中眠盘餐荐鱠
蛤调咸异肥膾匪私一饭恩幸获能生还人生涉忧患所贵道自全聊以慰旅懷长哦遂
成篇

贺梅子玉州判升同知

昆山古娄县肇自秦汉置沿革无靡常东西屡迁治张昭首锡爵习俗頗醇粹徂晋

歷唐宋天挺生人瑞王李文武才范卫廊庙器流风尚不泯比屋敦礼义伟哉教养功必藉循良吏皇元集大统经国遠垂制乃俾县升州秩视古男卫牧守责匪轻考最备五事州介江海交梯航四方至击筑吹笙竽化居聰甲第逐年兵旅兴连营举烽燧征输星火急慘慘民日瘁不有贤者出何以慰憔悴夫君列仙胄来作州佐貳炯然玉壺冰岂受纖芥翳忍穷如铁石蔬食不二味绣衣观民风徒步屏车骑察君能尽职务德布恩惠上卿太尉府待君位不次区区貪墨徒駁剥崇货利事露藉其家窜殛及與隶嗟彼本无术视茲胡不媿蹇予濩落材占毕守章句聊以紀之诗用告諸在位

题畫禾

梅雨暗泽国布穀鸣桑阴吴侬躬耒耜播种乃力任来牟既登场出水秧森森立苗本欲疏庶防稂莠侵嘉实秫垂田沾溉雨露深猗嗟周后稷万世民所钦柏君天骄子游宦非素心吮墨抽秘思新图重南金如何佑陵笔只解寫花禽

送章元师之汴梁

孟秋天气肃楼船出东瀛微风吹五两初日明双旌晓踰料角险暮泊淮阴城木落原野回衔枚夜兼程大梁古魏地昔为宋东京吹台尚碑兀艮岳犹峥嵘弱冠曾一游兴懷动中情努力保明节麒麟纪勲名

送陈原夫还乡

游子念乡里艱时未得归心逐征鸿去目送孤云飞海内同文轨买舟委之水春还雪已消方塘曲尘起江倾东固山遗庙荒墟间重经旧闾里感慨泪潸潸儿童喜君至烹鲜击肥彘亲知喜君还扶老兼携稚握手话绸缪同寻昔钓游始信还乡乐犹胜万里侯

昆山五咏

娄侯庙

娄氓尚淫祀祠庙徧村墟疾病罔医药奔走讯羣巫椎牛酾酒醴婆娑乐神虞神不歆非类传记言岂诬圣人制祭法有功则祀诸昆山汉娄县旧邑禾与与娄县名尚存今在城东隅张昭洎陆逊封娄肇自吴桓桓孙将军仗钺东南驱升堂拜昭母情好昆弟如策薨受頤命拥立运谋谟諫猎止酣饮礼下魏使车忠言不见听托疾居里闾举邦憚威

严卒年八旬余伯言虽后出智略雄万夫权配以侄女数数询良图一从吕蒙举乃修荊州书潛军克公安徑进守宣都走蜀夷陵城蹙休夹石区相吴柄国命上疏陈立儲赫矣两侯功弥久而弗渝太守念委氓报本昧厥初遥祠既撤毀左道咸剪除改祠祀委侯像设崇屋庐复覩汉威仪清风肃贪汚遂令此邦人车盖相填于雨旸及疾疫走祷来于于穹碑纪顛末大刻龙腾擎于以告来者并解委氓愚丽牲歌送迎万世奠厥居

王御史墓

有宋建王极汴京欝嵯峨仁化浃迩遐林林英杰多昆山虽僻左土风粹而和明经擢高第踵接肩相摩御史乡先生学术正不颇五传究终始备论订舛讹粵在宣和间巍然中巍科初主丽水簿言事何委蛇说书辅春坊执法居諫坡从容苔时相直气凌太阿范公在馆下诘责加切磋卒为廊庙器词源浩江河高弟沙隨程入室非操戈宋史书列传耿耿名弗磨世变陵谷迁百年无几何城南新漕里荆榛埋铜駔景行世仰止高风激颓波门墙既有限樵牧安敢过再拜重兴感临风动悲歌荒苔封断碣太息为摩娑

李侍御墓

散步城南门始得圓明里宰上木已拱泉下者谁氏披榛踏宿草羨门半狐豸勋阀表阡石云是侍御史力行敦古学名衡其姓李世家本江都娶妇居婺渙射策明光殿看花长西安市出宰施善教矧肯猛政理至今松陵月清光照江水拜命登霜台白简冠獬鷹上言论奸佞手将逆鱗批勢障狂瀾回屹立中流■〈石互〉五贤不一肖赋咏光传紀挂冠归落庵著述惜寸晷硕学邃易经集传发微旨岂唯淑后进千古垂范轨九原不可作清泪何涟涟乡里众富儿厚葬从奢侈黄肠题凑密券台文绣被可怜土未干荒烟横断址后世仰高躅庶激俗靡復墓限樵牧何异子朱子

刘龙洲祠

刘君庐陵秀智次隘九州岛倜傥负奇气辛陈同侠游西登峴山首北望多景楼長謌过恸哭志在复国雠异材世间出高揖轻王侯奈何攀桂手不能占鳌头肆情诗酒间文焰射斗牛昆山非故里遂为潘宰留五十死无嗣埋骨东斋陬世代倏变易夷墓为平畴有司重封表立阙树松楸何人奠麦饭淒凉土一坏建祠立神主买田供庶羞仁哉太守心祭祀亘千秋

朱节妇墓

节妇茅氏女嫁为朱虎妻主馈事尊嫜婉婉年方笄夫官水衡守舅长大农司饋
转渤海功与鄼侯齐厮养纤青紫第宅切云霓天道恶盈满谗言致勃溪舅既瘦囹圄夫
亦为孤累节妇没入官诏赐提点师衣袂结两儿昼夜呱呱啼义不负所天矢死心弗移
抗志厉节操师亦兴嗟咨漕侯卯金刀拙庵比丘尼仗义出金帛以赎节妇归幸脱虎狼
口寄食居招提仰望浮云驰目送孤鸿飞俯视韶龄子良人渺何之百感集衷肠形与神
俱疲为妇当死节为将当死绥一病竟不起孤魂遂无依櫓自京邑归葬江涯孝哉
犹子谦具词陈有司移文上台省进奏对丹墀譬比曹令女夫死家诛夷勇烈虽少异操
行岂相违请录付史馆敦俗淑民彝制可出鸿恩甄表发潜辉荏苒三十年荒坟草离离
落日下牛羊芜没少人知偰俟古循吏为善日孳孳大书刻坚石华表双巍巍朽骨懷深
恩岂独邦人思感嘅成五咏纪实匪干私

送郭安道升宪椽

太山何岩岩上与云汉通流光洞相射照耀金芙蓉黄河水汤汤奔流去不已东下
沧海深曾波渺无涘顧此河山美襟带邹鲁疆扶輿孕神秀人物产贤良粤生我郭君秋
水炯双目清标颀而长碧梧峙鸾鹄结髮读书史浩气冲八虚崭然见头角顿与众子殊
周还丈室中左图右文史父母有愉容邻里皆仰企布衣束韦带箪瓢恒晏如游心羲皇
上自许稷契俱出门天地寬飘飘遠游志便欲凌高风赤手搏虎兕西逾秦陇地东泝大
江瀆为爱九华好结茅栖白云奈此堂上亲鹤髮被两耳家无担石储何以奉甘旨慙捧
毛义檄菽水聊怡颜缅懷遠大器置身簿书间朝趋鴈鷺行暮归问安否克孝复克勤天
赋非矫揉耿介守贞洁剖决言便便俯仰洎十载东西郡屡迁冰霜操愈坚刚柔不茹吐
黄堂飞荐章姓名達乌府八月绣衣使持节江之东薅荆蘚榛棘狐狸亦循踪抢才惟若
人修能获举援行看补舜裳胷有五色线黄梅雨初霁移文下桃州隶卒効奔走车骑拥
道周班荆西郭门长途马蹄疾遥望敬亭山草木似相识行行至莲幕挺挺立霜台平生
多抱负今日良慰懷江左民力疲况乃苦徭役早夕被鞭笞征敛从何出贪污挟势权舞
文肆凶奸剥民膏血那知稼穡难苍生命如鱼潑潑在网罟按行来何时问此民疾苦
嗟予一介士幸获望余光春风佳丽地文酒日相羊方期朝暮间坐听谈亹亹愧若秋空
蝇弗得附骥尾丈夫志四海慷慨轻别离愿言树勋业高步青云梯

陪陈彦博编修游永寿寺

积阴不成雨朝光散林丘郊原春意动芥麦青油油东冈直如矢隱见坼上州孤塔
倚天外高城枕江流江流去不返逝者如斯不所忻风日佳散步行夷犹岂惮冻泥滑言

往梓峯游梓封竹树深好鸟鸣相酬梅蕊吹残香飘雪沾衣裘慨想呂王孙掉臂辭封侯建茲阿蘭若施以良田畴忆昨结构初甲子方一周香燈夜達旦奉祀绵千秋志异蚩蚩泯泯灭同浮沤寿师禪門秀叅學踵前修神骏怜支遁词华拟汤休倒屐出迎客茗供相延留寒菘肥胜肉采掇荐新篋物岂有定味适口为珍羞语深俗虑释水木生清幽元龙湖海士竭来客沧州留题纪雅集佳句锵琳球蹇予发种种孤昧寡良俦愿为蝇付骥来往结绸缪

送昆山偰知州调嘉定

鴨綠漲江水鵝黃上柳絲二月委東道燕燕初來時委有賢使君白皙美丰姿聯芳五枝桂不數窯家兒豈弟民父母古希今罕有使君不我留涉江采楊柳柳絲弱袅袅江水流彌彌柳衰江水涸邦人思未已

賦得菊隱

菊如隱君子豈逐桃李妍严霜萎众草独秀秋风前采擷充服食甘馨能引年夫君丰城劍光獨牛斗躔韬采不自獻与菊同貞堅孤标回高洁豈隨寒暑迁決獄有阴德勉旃企前賢

耕读轩（集陶诗）

少无适俗韵贫居依稼穡农务各自归耕种有时息道丧向千载圣贤留遗迹游好在六经疑义相与析在昔余多师玄鬢早已白羲农去我久素抱深可惜

种桑长江边开荒南野际星紀奄将终风雨纵横至既耕亦已种及时当勉励收敛不盈廛冬日淒且厉时还读我书竟此岁月驶缅焉起深情懷役不遑寐守拙归田园
■ 〈义鸟〉安足恃

题赵希遠万松金阙图

峥嶸閬风岑杳渺蘂珠宮紫皇中建极金阙凌万松云生金毋帳日射玉女窓鳳鳥鸞鶴侍嘯歌声 ■ 〈口讎〉 ■ 〈口讎〉 劍佩百神集軒蓋羣真从广乐奏钧天洞章吟飞空东华主校籍南昌司考功丹书石室闕琼簡金泥封下视尸行徒不啻糞壤虫驥也富文艺疏派天潢中凝神入遐想含毫寄遺踪粉墨落縵素樓閣間青紅安能往从游伏

阙陈丹衷愿乞愚与鲁老为田舍翁

露筋庙书谢琼树所藏米南宫帖后

南踰召伯埭北望高邮城舍舟陟平陆散策舒羈情萧条原野迥寒日惨光晶行行止从祠虛堂走鼯鼃不知谁氏子中坐莫与京父老告我言斯女志坚贞驰驱丧乱余与嫂同晨征迫暮不得还沮洳聚蠡蠡嫂居耕夫舍女宿野嬛嬛失节泰山重视死鸿毛轻黎明筋已露徧体膏血頽庙食崇象设春秋洁粢盛我闻父老言感慨泪如倾猗嗟五代时鼎沸纷战争广陵行密据民饥日抢攘剗剔挂屠肆何异牲与牲孙儒入高邮驱民以为兵贞女蕙兰质肯同萧艾荣缅惟丁斯时辟地故遠行寧甘野宿死不就有帏生白玉岂受污歿身垂令名矫矫长乐老喪亡亦屢更四姓歷十君腼然秉鈞衡所以米外史穹碑勒新铭谢君雅好古模搨比瑤琼賦诗悼貞烈字字鏘金声俛仰旧游时海內尚承平荏苒三十年繁华变榛荆岂无青云士徇国输忠诚却怜偷生者犬豕加簪缨掩卷三叹息青灯照孤檠

爱日堂

旭日晓苍凉流晖照高堂堂中何所有鹤髮明秋霜斑斓彩衣子眷恋延飞光养志奉甘醴介寿陈华觴晓景薄桑榆喜惧心皇皇愿日不出没长在天中央

倪云林天平山图

峩峩天平山秀色横具区龙门两崖束壁立削铁如刦深萝磴滑冈回樵径纡野禽鸣声和岩树清阴敷遐观见夫椒一点烟中孤俯视白云泉惨淡在有无繫谁抽秘思歷览摸新图仿若楚米颠乃是吴倪迂斯人不可得安能相与娱笠泽春水生怅望正愁予

题待渡图

停骖长林下送目大江表故园虽在望山径尚深窈招招舟子来一苇橫波小松菊倘犹存归耕遠紛扰

倪云林竹木图

初阳被原隰微风度檐楹修竹弄晴色嘉禾敷春荣君隱笠泽上观物以怡情写生

寄毫素持赠重瑤璫

放鹤亭

胎禽本仙骥驾驭同鸾皇渴饮金茎露饥餐珠树霜雪蹊留篆迹月夜候笙簧颣别
踰蓬海偶下息芝塘芝塘虞仲里奕叶何蕃昌窈窕小亭静饗铄阿■〈弥上女下〉康
朝迎板舆出暮导板舆翔引吭随舞彩允颈侍称觴一举冲霄汉重来感丧亡道园遗翰
墨铁史志文章俯仰人间世须臾变海桑

幽居图

混混幽涧泉欝欝嘉树林水木互胶葛颇惬意者心书翻白日静鸟啼青嶂深茲地
可佚老聊以投吾簪

题米元晖云山圖

山横鉴湖曲水落剡溪瀆岩扉扑苍雪石林生白云回辕谢逋客采芝招隱君安能
驭风去结庐遠尘氛

访薛鹤斋真人不值

英英三素云璫楼出林莽中有仙者徒冥栖在其下手握造化机足摄天地户我欲
往从之凡骨未能羽唯见碧桃花循流出溪浒

送权上人兼东谅虛白讲师

释书经律论中分大小乘繇汉歷唐宋翻译卷帙增微义浩河沙究竟谅未曾权师
未识面闻誉如云腾兹登雨花堂闻妙心源澄庭眠惠遠鵝臂驾支遁鷹天池九万里扶
搖自此升为言虛白翁归休理寒鐙

耕学斋集卷四

●钦定四库全书

耕学斋诗集卷五

(明) 袁华 撰

○古诗 (七言)

李左辖菖蒲花

扶舆磅礴锺草木，粤有灵苗根踪■。《足戚》下嵌崖窦漱飞瀑，泽沐沆瀣初旭寸。十二节色缜绿，厥石昌阳叶上矗凌傲霜雪。气芳郁审能食之，面如玉嵩丘之人衣朱褐。翩然而来输国粟，挟以盘杼湛清淑。云根坚固岁不刊，花如车轮光皎然。素荣英英秀而妍，内秉贞白外婵媛。见之者昌寿绵延飞行八极生羽翰，岂但明目能引年。世人不信空自捐吁嗟，相国仁且贤。再拜上供紫皇前，为霖为雨蘊烦捐。

长平戈

长平戈头土花碧，长平城下坑降卒。将军战骨化黄埃，此物尚随鉏鋤出。识铭漫灭蛟龙形，犹带征人磷血青。也知在德不在险，四海承平安用兵。

送鄆九成泛海北上兼东秦希鲁

万斛龙骧舟输粟，转辽海若不浮日华。五色散霞彩，沧波澹渟如镜明。张帆打鼓春潮平，南风十日踰万里。高卧读书船自行，掾郎兹游冠平生。飘飘逸气凌蓬瀛，之罘缥缈海津近。北瞻龙虎环神京，张家口头酒初熟。长城城下垂杨绿，当垆燕姬二八余。手戛银筝唱新曲，旧游十载一茫然。落日相思梦寐牵，寄谢桥门秦贡士。何时风雨对床眠。

毗陵许左司中秋对月席上次韵

毗陵中秋月色好，清光散落千林表。乌台御史紫微郎，一笑相逢即倾倒。璫楼玉宇净无尘，金粟吹香爽气新。靓妆行酒谁家女，恐是天上乘鸾人。蹇予山林性疏散，不堪政比稽康懒学书。学剑一无成，岂解奔趋事生产。谁能褰旗夜斩闕，研贼手持龙爵镮。归来献馘长杨殿，夺取金印悬腰间。

德润堂为袁仲博赋

封禹之山仙所京石室金堂秘璫封当涂丈人居其中乘彼白云朝帝乡上陈唐虞登俊良浹以厚泽覃遐荒善实斯积流斯滂诸孙济济承余庆构堂崇冈修中黃服食太和饮天浆灵台虛明道日充日华曜英澈八牕谁其主之曰汝阳佩苍龙精冠芙蓉天君泰然體凱康稽首山立歌洞章岳祇川后翼两旁千秋万年镇兹堂

题颜悦堂孝禅图

堂背谖华黄鹄觜堂下江波流弥弥白头阿母在庭闻寸草春晖感游子颜师僧中学禅解谈空忆得离家时屋头霜叶绕红紫白云英英度娄水迎母南来奉甘旨金缕赐衣光纏纏献寿称觞母心喜越州剃髮睦州屢千载高风差可拟初日照青桐哑哑语慈乌念母不复见粉墨间新图君不见东家甲第连朱楼千金买妾楼上头筝笛琵琶间箜篌俾夜作昼肆盘游妇姑勃蹊兄弟仇讎不顾父母养而令父母忧颜师曾闵俦乌乎颜师曾闵俦孝禅之书鲁春秋

完颜巾歌

完颜巾金粟道人所制寄铁崖先生先生赋长歌以谢率予同作

混同江流长白东完颜虎踞金源雄身如长松马如阜蹴蹋黄龙城阙空鸳鸯泺上鶯鹅雪春水秋山事游猎黄河清后圣人生一代衣冠烟雾灭璫玉龙环四帝巾柘袍吐鹘装麒麟锦房芍药大于斗骅骝坐拥真天人传自中原文献家全胜白氍小乌纱金粟道人鬢已秃挟以双环归铁崖铁崖先生面如玉绣缕盘花簇朱襯鵠鸽小管沸筝琶春流银瓮蒲萄綠日日倒载高阳池落花漂摇风满衣九峰女儿拍手笑月中蹋歌舞大堤先生醉笔蛟龙走报以长歌意殊厚脱巾花底一掀髯笑倩柳枝来漉酒

赵仲穆游骑挟弹图（代作）

开元少年意气雄任侠不数陈孟公文犀带束鹄袍小骄马飒沓如游龙侧身仰望日丽丽为有流莺在高树两骑聳翩未敢前看送金丸落飞羽白头鸟啄延秋门渔阳尘起天地昏珊瑚寶玦散原野空令野客哀王孙平原公子五色笔俗吏庸工俱辟易写成图画鉴兴衰未必奢淫不亡国

白头母歌次韵徐孟岳

白头母少为倡家女老作种花妇短布单衣纔掩股犹记青年学歌舞櫻桃花发当
牕树艺成北上凤皇城不与长川教坊伍耶娘轻义重金珠婚娶论财漫相许失身为妾
权豪门背立银缸泣无语主家三入相中书万骑云趋当要路马前鹰犬亦遭时门下桃
李自成蹊共工一触天柱折舞衫歌扇都分携放还仍饮邻姬茶弟妹凋零无一家嫁得
涌金门外婿不鮮耕田能种花钱唐大家罗捡刮救死奚暇夸骄奢秋风荆棘迷花坞充
募新军隶分府别时血泪万行啼信州城下出征西前夫后婿何翕忽贵贱同为道旁骨
闭门花落清明雨梦寻旧谱移筝柱觉来无地觅夫骸悔不身先木兰去至

正己亥冬客杭有客持毛袜去久不见还因戏赋以自解

领军家有一屋輶东郭先生双破履我家旧物值偷儿赤脚端如玉川婢革鞬骨立
寒无藉风霜冻皴皮肉死线材寸短无所长浮世荣名轻弊屣鹅毛缝罽将奚施龟背刮
毛徒尔为系带难令释之结啮雪可怜蘋武饥松牕朴渥久不至褚衾暖饼空自随北来
毡根如瓠肥毳毛茸光陆离金刀细剪雪花落成毡足可供驱驰人生能着几两屐畏
涂巉岩半榛棘何似山东李谪仙酒酣云卧游八极

来龟轩歌为顾仲瑛赋

昔日辟地商溪头长涂风雪同放舟登楼见月思乡泪坐石观云忆弟愁落花芳草
青春暮归时喜蹑来时路入门梧竹两青青园池树石还如故中庭有物状若能赑屃踞
石■〈丹龟〉生苔相惊左顾一笑粲乃是河伯使者清江来重门扃鐍严且密曳尾泥
涂何处入固知异物神所登却胜余且网中得吾闻灵龟寿绵绵揩床一息三千年从游
鳳麌郊薮外会合龙虎风云前举目烽烟徧区宇巷陌铜驼委榛莽玉山佳处屋鳞鳞莺
花春满辛夷坞道人当轩写来龟邀我为作来龟诗蹇予材薄不能赋愿尔子孙金印悬
累累

射鱼行

东海大鱼鬚鬢赤首昂洪涛数千尺锯牙凿齿镜夹眸噓气云蒸天地窄恶蛟毒鳄
垂馋涎射工黄能相后先环以蟹甲鸣鼍鼓白日出没清冷渊前年吞巨舰哆口大江里
今年取渴虎掉尾南山址任公投辖不敢钓刺史移文讵能徙伏波将军虎豹姿先驱阳
侯后冯夷三千强弩水犀手海鳅龙骧衔尾来天吴罔象俱辟易黄间机张声霹雳箭迸
流星一点飞暴额推腮肝胆沥皇仁如天被海宇蠹尔恣睢自贻戚将军奏凯登瀛洲取

封■〈鱼蠹〉 鮓高若丘烛龙飞出天下白沧溟汹涌今安流君不见枯鱼过河泣肉弃泥沙蝼蚁食寄谢平头黄帽郎慎勿操兵取诛殛

柳风蓉月亭次铁崖先生韵

绿烟红雾摇兰塘婵娟泣露啼秋芳金虫朴帐花风热花底双歌蹋明月画阑十二悬晴虹美人香骨燕支红满眼春娇小蛮舞云锦书傅青鸟语亭中主者江左客春草梦回天下白

郑明德先生卖寿器以贅壻玉山道人复赠一棺赋诗以谢邀予次韵

山人右臂枯有棱日耕研田耘剗藤秆今年已六十五感时念旧身凌兢文章海内鸣当日老病穷愁如猬集子亡女长当贅壻无钱卖棺情岂恤江空木落西风高短衣破屋惊搜牢相逢玉山泪流霰老我太平难再遭玉山重义急水火为制棺若蚕得纏裹便呼老仆荷锸随醉死何妨即埋我君不见北邙山荒坟累累白草间积金何如积阴德黄鸝能致三公环

北山寓兴

北山之中春载阳膏雨霖霪草木长溪蔬野蔌青戴土老饕采撷充枯肠枸杞黄凝鞠菹熟萎蒿青点芹羹香步寻木鸡竹风冷手拾菌钉松露瀼瀼拳敷腴竹萌嫩韭木丰肥同笔姜蟹裙鹅掌俱退舍牛炙豚蹄难擅场春光烂熳过三月静爱幽香生野芳寒具藤花甘胜肉凉饼蓼芽圆截肪槐叶光浮素盈冻含桃花映清尊凉石芥鼻触气辛烈金虀齿嚼声宫商不蒙朱门贵介录独许白屋幽人尝物无定味贵适口冰壶先生真欲狂莱公万羊数已定庾郎三韭贫何妨分羹不均御者怒染指未食天伦戕骄奢淫佚古所戒口腹累人良可伤山中之乐乐无央秋风又到莼鲈乡菊黄橘绿萸蟹紫桂酒新篱香满觞菜园不愁羊蹋破便当烂醉眠糟床虽然此腹久负我结交岁暮母相忘

再用韵懷钱塘旧游

忆昔南游浙水阳越山青暝吴山长青鞋皂帽紫筇竹跻跋鸟道登羊肠葛翁岭下丹井冷西子湖边花草香螭头画舫载歌舞醉归零露何瀼瀼幻仙时居灵石坞清斋遠致霜前姜酒阑嘻笑即挥洒笔陈酣麈文艺场骑■〈鱼蠹〉上天虽不返潜德百世犹流芳柳洲数过拾遗宅绕屋清泉甘若肪湖南宪幕官不调一别四见秋风凉顧瞻停云

动遐思落落端如参与商欲谋斗酒恣欢谑感念死生安忍当山阴狂客老更狂舟楫欲来道里妨黄尘闌天尚格斗岛夷峒蛮相夺戕可怜杀戮到鸡狗今我不乐心孔伤兴亡治乱固有数流毒海内谁遗殃眼中之人美无度安得放浪来江乡时维清和白日永溪毛采掇供壶觞并游英俊屡入梦梦觉明月流空床但当痛饮醒复醉驩乐悲哀俱两忘

题美人汲井养花圖

苣石莺啼琐窗静御柳条长拂金井美人初试薄罗裳翠袖双擎玉壺冷璫树花开璧月圆一枝折得浸红泉莫教野鹿偷衔去狼籍香囊蜀道边

纪行歌送陈士惟新喻教授

陈广文短而精悍才且■〈仁雋〉投老遠之新喻任中流扬舲张大飄乌帽霜华点秋鬢忆别楚乡今十年梦想江山动游兴忆昨经览初看山数去程放舟娄江口挂席南风轻长年三老椎大鼓酬酒割牲祈降灵开头捩柁入扬子东望淮沙海门紫鲸鱼吹浪波冥冥不觉狼山去如驶舟行三日数百里忽见金焦屹相峙鐵瓮城頽壁垒荒百战英雄嗟已矣晓行朱金沙暮泊石头城不闻商女歌玉树黄芦苦竹生秋声复泝彭郎矶还经敷浅源落飄官亭湖遥见香垆烟却忆仪真不数日行尽长江十三驿大孤雨晴冰鉴开白石青林暝行色始离墟落见城市高閣魏魏对山起摩鐵柱吊旌阳俯仰清风懷孺子三洲橘熟秋雨霜枫林点染兼丹黄烟华万井照金碧石城百雉围清江范太史清江生视草登紫阁看花游玉京子今往彼我歌纪行范公虽仙典刑在山川草木皆知名醉歌击唾壺君毋忧问涂安得成寃輩写作长江圖

游惠山寺

苍山蜿蟠九龙石泉混混流其中下灌吴田数千顷泽物岂止煎茶功支分余润及草木松杉枯栢青蒙茸只今无锡天下济鍛冶不复炎烟红甃羣嘯从祠空遗像者谁桑苎翁波泉酌地荐苹藻俯仰千古懷

清风静安堂为娄下徐氏赋

娄江东下经昆丘上有新堂河渠渠轩荣窈窕通绮绿挟以槐柳罗前庐堂中之人美而修集芙蓉裳紫霞裾心不妄动安无虞谁其主之曰姓徐女红麻枲子治书丰年多黍仍多稌视彼利欲争纷掣尊沓权门足次且何如静安安厥居汝阳作诗置座隅勗尔

朝夕勤劬劬母纵逸乐荒于嬉审能行之寧尔躯

耕学斋诗集卷五

●钦定四库全书

耕学斋诗集卷六

(明)袁华 撰

○古诗(七言)

复邹忠公墓为谢子兰赋

有宋开国三百年圣君哲后登才贤内无吕贾武韦禡昭宪流裕遠且绵宣仁垂帘辅哲庙初政彷彿元丰前奈何权奸枋国命党籍忠良俱左迁紫宫正位俨宸极岂假巫祝循私偏非言构狱狱词具奉诏废作瑶华仙谋之者谁郝内侍卯金刀氏相夤缘元符授册立为后奸臣揣摩机已先维时忠公居諫省从容奏对言便便属比祥符永平事春秋大义星日悬孟后既废不可复刘岂得擅中宫权遂良还笏为斥武好礼上书因諫玄忠言逆耳竟遠谪徒步独上新州船贞哉贤母成子志身落瘴鄉甘弃捐端王嗣位肆大眚放逐两载蒙生还寻复正言转司諫三守剧郡亲蕃宣俄承天语询諫草云付烈焰飞炎烟伪书一出那可辨再由衡岳移漓川澹山寺中啼恤鸟仙宫岭下流清泉精诚端能动天地神物卫护非伪传豺狼载路尚猖獗脱身虎口仍颠连放还未几瘴疠作一病不起寧非天仅存余息见故友言以国事犹拳拳公也程门弟子列存心慎独功弥专思陵赠谥发潜德已死奸谀应凜然常州城北十里许高坟累累官道边政和迄今二百载子孙散落犁为田牛羊暮下蒿棘满泪落行路兴哀怜谢君慨当世士献书天府言数千建祠复墓限樵牧新松穉竹清阴圓呜呼章蔡终贬窜同恶岂能谋自全青山门外一坏土尚有诸生加豆笾忠邪犹来难并立不信请视思贤编

匡山歌送恢复初上人

有美人兮思匡山岁云暮兮道险艱江空积雪涛波若山立骇慘栗兮凋朱颜邀芙蓉于五老兮怅飞瀑之潺湲颠崖絕谷以掩靄方翼层霄而高举如翥凤而骞鸾长松幽兰芊绵野芳鸟道百折上扪翼轸不得穷跻攀鹤夜怨而寡侷迟夫君而未还山川摇落

兮老冉冉而懷土歌匡山兮将归望孤云于极浦嗟昔人兮既遠访遺踪而覽古社結蓬以植花林卖杏而守虎驱飞锡兮踰险阻云为扉兮月为户携匡山兮招应真饭松花兮饮石乳展丹屏之九迭泝银河之三梁阅琼经于户室采金芝于珠房霞气朝润天光夜明养贞素于恬澹兮聊消摇以徜徉嘅鸣凤之不至胡众鸟之高翔駢虞弗仁駢駢以良树櫓析桂用狼牧羊彼方以跖蹠之为洁廉兮又奚慕乎夷齐采薇于首阳赋归来兮彭泽懷高士于南昌清风至节照今古吾将尚友于斯人兮歌濯纓于沧浪瞻白云兮思君何山高而水长

野老移家图为谢子兰题

野老移家向何许乃在吴松之甫里治生拟学陶朱公钓竿欲觅玄真子小儿读书坐船头大儿击楫歌中流细君斫脍妇炊黍老子醉卧芦花秋人生真乐不易得儿女团栾居泽国避秦何必问桃源朝泊江南暮江北

分题得雪夜击蔡

蔡州城中盜弄兵蔡州城外皆行營洮河將軍猛如虎奇材盡選山南英夜龍張瓜天雨雪大風偃旗肅欲裂銜枚發刃彀弓行洄曲朗山道俱絕懸瓠城多鵝■〈務上鳥下〉池擊之使鳴敵弗疑健卒前驅坎墉入假柝傳夜聲迟迟黎明雪霽城已墮尚咤兒郎求褚衣白袍單騎降帳下渠魁檻送來京師受俘獻廟歸飲至文章千古平淮西雪巢雪暝梅花白玉盤香醪凝琥珀英雄豪傑無時無莫笑出門天地窄只今汝蔡起風塵千里荆榛犬食人安得將軍提寶劍剪平大憝慰生民

白云楼歌次韵文学古

白云樓居深復深道人燕坐云為心未逐神龍澤天下時從倦鶴栖岩陰玉氣虹光射虛牖天逼闌干挂牛斗始信桃源隔一塵世人只許聞雞狗君不見茂苑長洲荒草里豪傑銷沉呼不起功成身退去者誰一棹鷁夷渺烟水又不見秦川公子走干戈龍顛虎倒奈渠何落日凭高望鄉國愁懷借酒生春和世事興亡等飛絮難挽黃河水西注御風八極恣游邀歸去還依白雲住

灵壁石鱼磬歌

灵壁石鱼磬房山高公所遗杜南谷真人者后归开元王溪月追溪月歿南谷之孙

丹丘复得之铁崖杨先生志其事汝阳袁华为作歌曰

鯀公潜迹淮泗渊禹门烧尾凌风烟未随磬襄蹈东海先从琴高游九天天家披腹星磊魄帝遣下主芙蓉仙赐恩三品甲之上黄金寶带腰间悬俄逢穀城文人怒迁谪乃居灵壁颠补天不值女娲氏支机徒传博望骞苍颜绿发嗟老矣时同樵牧云根眠故交相国牛与李后之继者惟米颠相逢倾盖即下拜握手话别经千年块处山林返初服穷探理窟加■研房山胸次有丘壑萍水俪结三生縁间厕笙镛列堂下五音繁会声相宣岁暮栖迟南谷口日与琴劍相周还飞鳬叶县览溪月一往不复寧无愆通玄真人素有约招之归老丹丘田具区泽中访范蠡计筹峰顶寻辛钘延平劍去亦异事合浦珠还非偶然千秋翁仲荒草里万岁艮岳寒芜边感今嘅古重太息人亡器存良可怜君不见贊皇平泉醒酒石子孙世寶称其贤

映雪轩

朔风卷地地欲裂黄云涨空江水竭素娥骖驾万娉婷纷舞霓裳下瑶阙华屋酣春暖围肉泛蚁浮羔叫横玉锦帐流蘋犀辟尘胡蝶交飞梦魂熟老康悬鹑肌起粟竹素园窥鬼夜哭青藜无烟沉烛龙万壑清冰眩双目方诸露吸孤蟾精冷光倒射玻璃明碧纱笼烟照芸叶钩天九奏箫韶鸣蝉聳簪组桐城族堂下珊瑚森列竹轩开虚白境閨寥夹座粉香飘萼綠玉盤龙团捧纖指狐裘蒙茸据乌几醉援毛颖传冰壶笑杀清狂回剡水

寄题吴兴任孟晖溪山春晓畫壁

我家苕溪山水窟流寓娄东归未得前年避地到乡间亲戚欢迎慰岑寂长桥崕崙势如龙下饮大溪垂渴虹先人旧业桑梓在石田数亩松亭东南望羣峰奔万马森森鸥波连若下桃花夹岸放渔舟疑是仙源问津者谢家客儿有髮僧俊爽捷若秋空鹰有时清唱醉花月有时趺坐谈三乘结楼高倚云松杪门对溪山春日晚谁人粉壁写成图索我题诗故相恼漫歌溪山春晓歌安得杖屨同婆娑为询旧业在溪浒穉松丛桂今如何

送缪生之钱塘省亲

缪家郎目烂岩电光金线衣蟠柳色黃紫荷囊佩玉钩长暮朝读书不下堂宛若丹山雏凤凰吴城一夜兵戈入老幼苍黃计安出搜牢幸得此身存翁媪信音何处觅青天荡荡日重光太行可梯沧溟可航不愁水有蛟鳄道有虎狼舟遥遥指钱唐舞斑衣称寿觴和乐泄泄气洋洋君不见东邻老翁金满埒骨肉凋零子孙絕人生贵在亲目前万里

封侯奚足言

拜石坛歌

顾君仲瑛所藏湖石上有蘓文忠公题名后复获公快哉亭帖追一时物也乃命朱珪摹刻于石因丹丘柯博士尝拜之白野监宪公题曰拜石坛仲瑛邀予作歌纪之

眉山三蘓宋儒宗长公矫矫人中龙南迁儋耳西赤壁文章光焰超鸿蒙快哉之亭雪初霁领客登览山川雄自言平生不解饮胡乃一举觥船空和诗寃限见真率凿崖题石磨苍穹功名富贵等丘土断碑残素垂无穷吁嗟异物神所卫玉山合璧俄相逢奎章博士丹丘翁江南放逐惊秋风见之即下米芾拜二颠痴绝将无同筑坛山中加爱护树以松桂连椅桐雨牕云户湿寒翠朝阑暮槛开晴红白野御史龙头客青年献赋蓬莱宫戯将秃颖写■扁断钗折股星流虹祗今烽烟闔河岳王侯第宅皆蒿蓬牙籤玉轴映竹素好事独传吴顾雍姿东朱珪铁作画字字玉屈盘螭虫嗟哉昔人今已矣惨淡故国风烟中如何二子复嗜古策勲翰墨收奇功我来再拜重太息苍苍古雪吹长松登坛絕叫浮大白酒酣目送孤飞鸿

戲簡強彥栗

钱塘湖边春日晖邓家蛮娘金缕衣向人凝笑语娇涩陌上花歌缓缓归伯劳东飞燕西去恼公无限相思意有约荷花庄上来紫莺笙里留春住

美人剖瓜图

蛱蝶双栖蘋草花轻衫新试方空纱髻斜■〈影上委下〉 ■〈影上隋下〉不复理小鬟初进青门瓜昆刀未截瑠玉璧手奉瑛盘倦无力嚼破红冰如蜜甘谁解黄台语淒恻

玄门草闔歌

吴淞江北丘虚南壤土沃衍泉水甘宅幽据胜得佳处乃是玄门之草闔闔中主者貌奇古昔曾骑从将军府锦绣楼台刲火余豪杰销沈化黄土一葛兼一裘归从赤松游采芝行引鹤卖药或乘牛得钱沽酒浇牢愁挽之那止輒掉头霸陵醉尉不呵问烟波钓徒相倡酬草闔足佳致当牕昆玉峙流云度松颠飞泉鸣竹里可以烧凡铅鼓素琴屏三

彭戲五禽漁樵或爭席利祿豈關心斯時斯境不易得按圖便欲窮幽尋登真隱決僊相與迟汝弯笙县圃岑

刘孝子行

丰城孝子身姓刘年始十三复父讎天子临轩亲顧问再拜阶陛重叩头臣父出宰海上州奉宣德化纾民忧民有大猾曰蔡某作官乡里仍行贿交私寮佐构间隙妄陈大府诬罪訛使者巧诋遂致法遠谪煮海为羈囚臣甘解衣伏斧锧愿白父秩寃之由诏下执法复虑问主谋枭首余皆僇嗚呼孝子罕匹俦太仓少女差可侔更请长缨系强虜策勲万里归封侯

梦彩堂为余士平提学赋

彩服染緇尘游子遠辭親游子彩服敝恩賜朱衣新曉冲燕山雪問程揚子津西望
不见匡庐云江南已老莺花春食寄吳下旅館燈昏夜身逐一篷飛心隨孤蟬化阿

■ 〈弥上女下〉倚門迟子歸奉觴拜舞趨慈闈堂阴蘢花大如斗堂下玉樹森成圍子
歸何草草母樂亦融融俯視兒身衣猶是母手縫慈烏择木思返哺啞啞悲嚦近堂樹空
梁月落夢回時此身有媿南飛羽

送印月潭归穹窿山

春草徧南陌春潮流落紅美人文水上一舸逐东风一舸向何处言歸故山去雉鳴
苦竹冈离情黯烟树故山穹窿高挿空重湖倒浸金芙蓉缥缈寶樓林壑中晴嵒暖靄霏
帘栊三年不蹋虎溪路夢禮大士青蓮宮風景既不殊山川宛如昨為問鵠夷舟何似支
硎鶴安得相從訪二公醉蹑丹梯倚寥廓山崖乳蘭芷芳臨溪采擷煩寄將相思引领天
一方載歌招隱為報章重來握手成大笑楊柳花飛春筍長

云西老人春山平遠圖

云西老人富文艺博闻好古无仕志我虽不识尝夢之矫矫丰姿鬚磔駕馭风騎氣
上钩天断缣尺楮人间传点染彷彿营丘李重冈复嶂孤云边溪头春还雨新足灌木苍
苍柳将綠漫郎刺船何处去待向前村借书读人生富贵如秋烟草木同腐良可怜老成
典刑不復見展卷題詩心惘然

分题得南武城送顧仲瑛之濠梁

南武城在娄水闔闾昔筑候越兵檇李兵交竟伤指夫差一战虽复讎尝胆毋忘会稽耻大夫种至请行成属镂卒赐忠臣死争长黃池盟寧知甬东徙南武城城已墮我来覽古仍賦诗棠梨花落雨丝丝游子西行何日归怅望不见令人悲

高房山云山圖

尚书高公寫山水神妙深造董与米想当解衣盘礴初云气淋漓落生纸忆昔故都全盛时大藩冠盖罗熊罴春明幕府文字简缓带轻裘信马归湖上青山龙凤飞五云特立何巍巍阴晴朝暮多变态点染粉墨归毛锥嗟予生晚徒企慕不获从容陪杖屨小牕展卷记曾游彷彿初阳台下路溪回略约号惊湍松山漠漠生昼寒仙翁丹成已长往空留馆宇琼林瑞三边烽火埋黄雾梦堕湖山未能去鸡犬相随欲问津避地桃源在何处

赠李扩

苍颉史籀世既遠斯冰徐张犹善书国朝杰出吴与赵俗工纷纷讹鲁鱼如锥画沙钗折股会稽峰山化黄土尚幸新泉丹井存更有吴兴能复古鸿都石经劫火焚蓬莱翻刻亦飞尘二碑屹立颖昌里字画犹为人所珍青城山樵虞阁老书法中郎名誉早萧吴杨杜号升堂昆吾金刀刻刚卯华亭李扩心好奇凡将尉律幼所师商盘周鼓秦汉石临摸扫秃千毛锥竭来相见娄江沚鐵崖鐵限亲曾履富儿金多招不行门外求书日成市慈亲倚闾思告归去匆匆仍索诗嗟予潦倒丘壑里迟子铭功书鼎彝

张师夔關山行旅图

青山盘盘树簇簇冈峦萦纡路诘曲长桥如虹横絕谷崩崖中断歛雪瀑客子出门霜满屋石磴荦确驴轝觫溪头待渡人立鹄烟水微茫漾初旭东穷沧海西岷峨梯扳鸟道航鲸波重楼复阁岩之阿安得税驾同婆娑夔翁八十双鬢皤饮少輒醉醉輒歌泉南漫仕廿载过不归奈此溪山何

怡云阁

甲申岁闰张贞居先生过予娄江之书楼偕行则句曲周本原也二君先后蜕去今已廿载矣周之仲曰致和以予与其伯兄有一日之雅遣侄虛白来征怡云阁诗虽未及

识而义不可辞敬赋一解并致懷思二君之意云

句曲凋仙馆兹山多白鹄积云荡胸起层霄纷郁郁卷舒本无心成盖复轮囷五色散晴采三素堕寒影朝随白鹄积金峰暮逐神蝙蝠乡井山中宰相挂冠归身似闲云岂受羈不堪持赠赋诗寄变化静观聊自怡商之孙子清庙器灵笈琅章发玄秘飞阁冯虚杪万松阴合牕扉凝玉气贞居先生杨许俦曾过娄江江上楼论诗秉烛坐清夜倾盖始识髯翁周我亦华阳洞中吏不归已是三千岁西访髯周弟与孙为觅怡云当少憇

送友人兴化卫幕

六月入閩關榕阴夹道凉鶗鴂飞鸣苦竹冈一重一崦山苍苍云山苍苍马前起南往莆田尚千里干鱼望祭武夷君考亭肃谒朱夫子九仙委蛇海上来挟以鸟石何巍哉黔黎久沐常袞化野花自发閩王台候吏立江浒小队前负弩高城屹屹拥储胥太府潭潭列貔虎税驾趋莲幕考籍阅我师时平简书静览古还哦诗端明古遗直夹漈富著述子孙虽为庶遗迹犹可觅亦有护法之善神窃弄威柄痛生民忠邪同归一坏土耿耿信史书奸臣送君莆田去兴懷歌短歌登高傥有赋驰寄莫蹉跎

蘓小小像

钱唐江中涛似雪钱唐湖头好花月钱唐女儿蘓小小艷质清歌两奇絕紗牕梦回春已深黃梅雨润越罗衾 ■〈影上委下〉 ■〈影上隋下〉 结偏倦梳掠袖携檀板愁萦心冶容诲淫古所鄙千载尚犹传畫史却忆当年桓少君鹿车共挽归乡里

送吴敬德之济寧

黄河冰泮春水生张颻泝流三日程买鱼酤酒入闸去柳岸桑畦嚦早莺歌风台前尘眯目道路征车声辘辘祇今边徼静烽烟百丈纤船随处宿济州城下旧曾遊少年歷览今白头秦碑汉碣尚壁立大书深刻蟠蛟虬太白酒楼高百尺东望青山是邹峰市井虽经劫火余风景不殊还似昔送君娄曲柳色浓大船挝鼓声隆隆归涂拟蹋梅黄雨莫待霜林枣子红

张溪云耕读圖

雨过青山麓溪流涨新綠麦熟雉将雏桑老蚕上簇荷锄朝出耕释耕还读书行行

负薪诵咄咄带经锄门无石壕吏戶有毕卓瓮客至輒倾尝嬉笑杂嘲讽此非桃花源乃是朱陈村儿女毕婚嫁含饴弄诸孙于戲鬚張非畫史才比中郎亦无子空留遺墨在人间竹屋荒涼月如水

赠刘宗永

曹魏制墨推韦氏后来独数南唐李李家父子艺絕伦徙居歙岭由易水胶煮鹿角松花烟劖脊小饼双龙骞坚能削木黑点漆好事寶藏今尚传蒲潘郭叶宋诸子姓名班班书墨史近代西江朱万初龙香上贡奎章里嗟予老病卧山林时磨破砚临来禽清晨有客叩户入手抱豹囊操楚音自言家本庐陵住金粟冈头钓游处南穷五岭北燕然湏洞风尘未能去少年结客轻公侯五陵豪侠同追游黄金散尽黑貂敝空余老气横高秋却埽烟煤开瓮牖榦汁和胶审时候丹砂紫沈脑麝金万杵春雷鸣铁臼一螺玄玉莹无瑕时时抱送文章家得钱酤酒开小口醉蹋明月欹乌纱我闻此语重感慨兵后高门几家在绣衣纨袴走乱离无术终填沟壑内只今车马四海同大船挝鼓扬轻篷西泝宫亭过章水投老还乡谁似公

鹤瓢山房图

鹤瓢山房大隱所居乃在泰伯三让里虽道迫塵市山林如鹤瓢仙者玉为质紫髯猾磔目点漆小谪人间甲子初那计缑桃几偷吃丹成不肯独长生时施狡狯蘊罢民金针幻作黍珠境跛痾积逮皆能行既识鹤瓢胜按图入冥想彷彿得要领长藤古木路迂回飞泉落涧声喧豗不放落红随水去恐引辟地秦人来鹤可骑瓢可酌酌罢县瓢身上鹤世人仰望不可亲謾謾松风号万壑

玉山草堂为沈南叔赋

东老草堂在何许昆玉峰前娄水阳恠石当门猛兽伏长松绕屋神輪翔芸牕展卷声琅琅若出金石谐宫商嵩高山中隱者所浣花溪上诗人庄小亭野芳发幽香鸥波淼淼涵天光南邻老翁觅酒伴短筇缓策行相羊草堂之乐乐无央豺虎遁迹罔两藏何人寫图落尘世乃是四明狂客老更狂乌乎四明狂客老更狂生纸泼墨兀老苍

杏花金羽圖

盈盈嬈杏花团雪秾艷飘香春正月绣幙低垂护晓寒金羽枝头巧调舌风流词客

太多情花中吹笛到天明援毫不草江南赋粉墨经营为寫生

太真睡起圖

博山烟销沉水香昭阳殿中清昼长桃笙翠滑睡初熟嫣然秋水芙蓉芳绪龙爪痕
殷不灭寶钿尚掩酥雪漁阳鼙鼓惊梦还化作馬嵬坡底血

耕学斋诗集卷六

●钦定四库全书

耕学斋诗集卷七

(明)袁华 撰

○古诗(七言)

送朱道原归京师

君不见范蠡谋成吴社屋归来扁舟五湖曲之齐之陶变姓名治产积居与时逐又
不见子贡学成退仕卫废举鬻财齐鲁地高车结驷聘诸侯所至分庭咸抗礼马医酒削
业虽微亦将封居垂后世胸蟠万卷不疗饥孰谓工商为末艺泉南有客陶朱孙大舶东
望扶桑瞰石塘万里限弱水贝阙珠宫光吐吞直穷南海极西海生擒蛮寇龙牙门岛衣
卉服识名姓懋迁有无争骏奔圣明文德洽区夏诏遣移家居阙下亲聆天语覲天言岂
是寻常行贾者兹来委上督诸商会看重译贡殊方明珠撒殿献琛赆天王端拱当明堂
朱君朱君不易得务财逐利通絕域只今太史笔如椽汗简杀青书货殖

赵仲穆幽禽圖

水精宫中春已深雕鞍游骑蹋湖阴金丸不打返哺乌彩笔自写孤飞禽明牕棐几
光相映吮墨含毫清昼静王孙不归春草生鷗波万顷兼天净

陪顧仲瑛祭張貞居回飲湖中分韵得奇字

连朝风雨不出户今朝雨晴山色奇涌金门头买画舫黎明径度湖之湄张公学仙
灵石坞藏书塞劒荒山陲丹成驭气九天上长松落日风飕飕玉山草堂素有期死生契
阔良可悲剗羊载酒拜祠下俯仰今古兴遐思君不见附子冈头师相墓只今惟有草离
离

钱塘钱思复匡庐于彦成幼同笔研重会于顾玉山许思复赋诗邀予次韵

会稽外史玄都客手校玉文坐瑶席一别中岳三十年谷魄林慚少颜色白水真人
冰雪容曾访卢鸿至寧极翩然而来动遐兴飞适丹崖千丈壁相逢忽在玉山中不计人
间岁年易赤城霞外忆同游石洞桃花几回碧桑田变海海扬尘也知狡狯今非昔玉山
八月秋正好银潢西泻星虚直紫箫吹月酒如淮露华洗天天影湿御风不作三山游豢
龙归应西池役僕过金马到玉堂为我问讯众仙伯

春晖楼牡丹

春晖楼前牡丹树喜见新花发旧槎深根培植雨露厚不待羯鼓花奴挝紫黄红白
绯与碧牙牌小篆蟠龙蛇玉环飞燕两倾国国色晕酒凝朝霞就中一枝最杰出金铃绣
幄相笼遮前年作客浙水上去年避地苕溪涯千葩万卉自开落媿我不见空咨嗟今年
花发风日丽况无兵燹吹黃沙金尊美酒唤小妾起舞折花簪髻了酒酣乐极重太息故
人南北音书赊虎头学佛宗三车饮酒食肉谈空华了知何必假外相始悟在家真出家
洛阳园池信可夸只今无树嘽栖鴟玉山山中称乐土杳杳百里连桑麻诗成对花还大
嚼一任白髮欹乌紗

卢伯融秦文仲同集湖光山色楼分题得阳城湖

海虞之南姑胥东阳城湖水清浮空弥漫巨浸二百里势与江汉同朝宗波涛掀簸
日惨淡鱼龙起伏天晦蒙阴渊雨昏火夜烛下有物恠潜幽宫度雉巴城乃其亚以城石
湖湖不同（度城雉城巴城皆湖名在昆山）想当黃池会盟后夫差虎视中原雄东征
诸夷耀威武湖阴阅战观成功陵迁谷变天地老按圖何地寻遗踪我来吊古重太息空
亭落日多悲风（湖之阴有村白夷亭吴王征东驻兵于此故名见吴郡志）虎头结楼
傍湖住牕开几席罗诸峰鸣鸡吠犬境幽夐佳木良田青蘋葱蘋舟俨若问津者仙源有
路人间通时维端阳天气好故人久别欣相逢頽黎万顷放舟入俯览一碧磨青铜恩赐
终懷鑒曲客水嬉不数樊川翁莼丝鲈脍冰缕碎菱叶荷花云锦重酒酣狂歌发逸兴白
鸥惊起菰蒲中相国井堙烽火闌官水涸旌旗红此中乐土可避世一舸欲逐陶朱公

安得列缺鞭乘龙前驱飞廉后丰隆尽将湖水化霖雨净洗甲兵歌岁丰

岁寒圖为孙惟善陈彦廉赋

九日山在泉州南安县西唐秦系结庐其间注易老子有石茶灶碾具存时姜公辅以直諫忤德宗谪兹郡别驾始与系交过輒终日姜之卒也妻子在遠方为营墓茲山之麓秦年八十余后不知所终宋初刺史陈洪进即其地为秦君亭因感其友义之 ■ 〈廿马〉以处士而葬故相故及之

泉南诸山何 ■ 〈危支〉 ■ 〈阝区〉清原洞天仙所都赤明开劫风气舒玉检丹书闕神符重楼复阁山之隅鸟道百折非一涂云旗昼下猩猿呼钩辀格磔嚦鵠鸽松风謾謾吹笙竽芝兰荪蕙春芬敷巴且花黄荔子朱羽人飞行天为徒或跨白鹿骑于菟侠以鸾鹄从双鳬东穷弱水窥方壶越有莆田列仙儒以鞭鞭石石受驱长桥横波龙脊疴下通舟航上轩车流木一发云外孤蛮蠻出没乘舳舻南金大贝犀象珠川倾山积来委输九日特立青莲树秦君屏迹贾不沽闭门著述与世疎有唐宰相陈谏书谪宦南迁鸟在笯室家既遠身乃愈为卜茲山藏其躯感懷友义增歎戯尚存茶灶亭已荒山川清澈气鬱纡维孙陈君生絶殊提孩嬉笑共里闾翩若丹穴双凤雏下览德辉瑞唐虞又若汗血天马駒奋迅岂与駒骀俱南游百越北燕都偲偲切切相友于志坚金石矢弗渝管鲍陈雷张范如寧競锥刀较锱铢竭来娄江住斯须城南新僦宅一区前槐后柳荫屋庐草蔬同饭步同趋嘅彼末俗肆覬觎附势逐利情愉愉刎颈之交汉耳余反面仇敌良可吁以柳易播忠诚孚高风千载敦薄污岁寒松柏知后枯好事绘写开新图我作歌诗匪徒谀愿子善保慎厥初

戊戌纪事次韵頤玉山

君不见天马来凤之颈龙之头五花聰娟云凝肤朝燕暮越歷块过奋迅岂畏川涂迂蹇予駒劣材结髮学读书到今居无庐出无驴上不能游说捭闔下不能懋迁有无穷櫨风雨四壁立簾瓢屡空恒晏如丙申春海虞山岳之榆况乃江左乏夷吾携妻挟子苕溪居苕溪野老起荷戈岂识尺籍共伍符舳舻銜尾一旦溃强梁脱走庭贏诛山川异故里焉敢嗟驰驱思欲南入杭之郛奈尔囊空担石储浮云蔽白日安得大风起飞扬为埽除汉家养士三百年岂无忠义者肝胆涂地捐身躯黎民流徙困征需班荆坐太息忽报兵入湖红旗张空半天赤勇锐遠过冯子都所至捡刮无遗余仓皇问归路扁舟隨钓徒朝行暮泊畏叫呼三日喜抵娄西隅下榻借玄馆蕭然罄儲須邻翁走相覓慰劳生嗟吁时当春夏交纖月明金枢青燈对儿女始得忘羈虞海东大舶驱万夫歎然而来纵壑鱼

军声震地撼八区筑城高高峙储胥奔逃窜匿纷在涂裹饭朝出如趁虚冒雨荷蓑笠移舟系槐榆我民日困兵日惰不分奇正启与胠运筹决胜千里外斯人未必能枝梧漫道不如归去好苦竹岭头啼鶲鵠归来惆怅百感集屋庐瓦砾田园芜田园芜县官尚索租駁剥膏血向仓输独有东家米粟红腐玉帛满帑因能舞文肆贪污明珠买小妾奉酒歌吴趋那知斩伐到木石千村万落皆逃逋所以杜陵杜愚溪愚饥驱窜逐竟不偶安得从龙跃天衢去年八月下明诏力贫买醉眠酒垆減民田租半雨露蘋槁枯秆今陇畝中岂无昔时之凤雏释耕汲修绠抱瓮灌园蔬春初翩然上会稽歷览俯仰同樵渔时歌短歌击唾壶山桥野店随意沽放旷不为礼所拘昔人金谷贮綠珠綠珠墮楼园已墟豪华销歇逐流水落日空啼头白鸟淫佚古所戒靡不谨厥初缅彼先哲士希圣作范模步武青云中绣衣缘偏诸乱离汹汹惟尚武何人英雄起狗屠不闻汉中兴天王镇坤舆天马来应瑞图生民凋瘵喜再蘋呜呼生民凋瘵喜再蘋愿同田翁野老击壤鼓腹歌伊呜

题姜养浩寄顾玉山诗后

虎头少年才且贤侠游不减杜樊川善和牡丹天下白看花走马春风前东家蝴蝶西家去双双高飞向何处尊前一曲断肠词荒草寒烟暗平楚

李嵩四迷圖

四迷粉圖谁手寫乃是钱唐之李嵩嵩当三朝应奉日点染人物犹精工建炎己后和议定岁聘杂沓金源东自兹民不识戈甲江南花柳春融融寬衫大帽修眉翁低头高揖身鞠躬柳娘缓带竟莫顧姓名却倩长须通阿鬟双手向前起倾身送酒如当熊就中老奴增意气鲸吸不觉金尊空平康巷中月皎皎温柔乡里花丛从寶钗斜欹粉胸露如此良宵偏恼公蜀丝锦障仙凡隔微见凌波罗韞弓更呼博塞相娱乐靓妆夹座分青红玉盆骰子呼五白百万一掷逡巡中锦裾绣袂金条脱瑤环瑜珥玲珑梟卢不成战屡北袒跣抱膝心忡忡两生格鬪气势雄手挟长劍星流虹白日衡行都市里籠豪不数汉秦宫翠钿委地花狼藉哀情已多乐未终古人图史置左右善者可法恶可攻耽淫斗博古所戒意匠彷彿箴规同小牕展卷增感慨萧萧暮雨鸣踈桐君不见周家帝业八百载太任遗泽何龐洪又不见孟光齐眉躬井臼钗荆裙布归梁鸿呜呼圣贤不复作幸有遗迹传无穷要知稼穡慎厥本嵩兮嵩兮何不图陈无逸兼幽风

祷雨诗为陈应辰炼师赋

己酉季夏天亢阳木槁草悴黍稌黄黔黎蒲伏号穹苍如瞽无相何伥伥有司骏奔

走郡望女巫舞雩紛浩倡箕毕櫓燎光載明闭阳崇阴禁门行精诚不格天梦梦共牺行空火云扬安得天瓢酌天潢净涤炎歎化清凉玄都中人衣朱裳服食太和日月芒赤子罹毒未渠央起叱风雷揜暘光紫鵝赤鸡飞符章檄召皓灵三山宫深铃掷火万骑骧玄冥前驱回禄藏丰隆屏翳翼两相少女风来舞商羊阴云四合大雨滂槁者淳然枯者生奚用暴巫及■〈林上...下〉庭至人无为道自充积精所致与天通故能弭苗驱厉阳我歌乌足为报覩愿子长年身受庆

蘓文忠公木石山谷題曰遺墨雖存万事非白头添我數茎絲晚來天柱倚空碧却似金門初見時崇寧乙酉五月十八日皖口舟中作

东坡先生白玉堂嬉笑怒罵皆文章南遷再谪過儋耳笠屐行歌烟瘴乡平生節义應自許瞰若烈日當空明一朝騎龍居帝旁遺墨散落人间藏經營意匠入遐思掘筆風雨翻濤江金簇飲羽猛兽伏鐵網出海珊瑚長白頭門客太史黃挂席皖口南風涼仰瞻天柱嗟往事二十八字鏘琳琅兩公书法宗鍾王龍跳虎臥鸞回翔如何宣和不見錄有媿京下名相望昔陪外史龍井陽壁間墨君兀老蒼祝融騎之上天去扶卷興懷憎慨慷

文湖州墨竹蘓文忠公題其上

清貧太守石室翁渭川千畝藏其中理閑舐筆盤薄贏兔起鶻落無留踪雨梢晴叶各殊態揮洒位置分纖秾鍾峰隱居拔鐙法氣韵生动將無同墨君一派來自東驥材當萃彭城公平生知己最親厚走書嘲戲言春容陳州官舍示長舌談笑化去當元丰嗚呼二老不復作空瞻遺墨翻鸞龍

送人之番禺

秋風夕起鴻鴈翔金井露涼梧葉黃攬衣待旦不遑寐明月皎皎夜未央問君客游向何方言往百粵穷炎荒浪波沄沄一苇杭西湖彭蠡越章江與蛟踰嶺梯重岡仆夫下上如鳥■〈目行〉番禺在昔財賦疆尉佗稱王兵力強百年五世已陳迹荒台草露沾衣裳野芳潤卉吹天香蛎房柱蠶羅椰漿飛鸞跕跕海氣蒼蒼古冯高兴慨慷塞予局促馬在柳安能與子同徜徉羅浮勾漏令乞得丹砂煩寄將

篆篆歌

云間善篆以所書草瘞之細林山中題曰篆篆爰來征詩遂賦長句以寄

- 54 -

庖牺卦画龟龙出颉诵造书鬼夜泣俯观鸟兽蹠迹依类象形文字立以迄三五
咸东封改易殊体靡有同周官保氏教国子六书大义开羣蒙太史籀文古少异小篆双
省由秦始仓颉爱歷博学篇三家著述初传世秦燔经籍狱讼炽乃尚隶书趋约易古文
虽絕汉草行尉律学僮乃课试东阁祭酒太岳孙夙尝受业贾氏门闵悼俗图昧所向博
采籀古加讨论揭示上下明指事转注假借形声意立为一端亥毕终分别部居不杂厕
亘千万古知字源昭若列星丽躔次中兴斯学曰阳冰入室操戈胡背戾二徐训释浩江
河仲也祛妄言不颇（徐楚金着祛妄辨李阳冰之误）吴兴张有尔杰出复古正俗订
舛讹布衣道士钱唐住玩世端如郭忠恕三十六举仅成编蝉蜕遗踪不知处席中加带
恶安西鼓皮离禹良可吁汉家去古尚未遠成皋印文犹重摹云间读书苦嗜古手校科
虫辨鱼鲁明臆净几风日佳临摸一埽千番楮商彝周鼓真吾师■扁沉着沙画锥弯回
凤翥龙夭矫长戈短劍相交驰书草日积充栋楣保爱何啻璧与珪细林山中一坏土缃
笈缄縢重闭之于乎襯帖藏玉匣终致温韬举菜鍤亦恐虹光夜烛天定有窃开窺笔法
冢头草鸣寒蛩蘊文瘞筆同高风后三千年见白日好事应营马鬣封

题黄侯子正盘松画壁

高景山中十八公轮囷伛偻何龙钟苍髯贞操凜冰雪偃卧丘壑辞秦封穀城之老
黄石翁左右驰突两石弓短衣疋马射猛虎解后一见倾深衷别来相思形梦寐素壁幻
出支离容不材匠石虽见弃择荫麋鹿还相从社栎固能齐上寿汉柳徒解暝东风昔遇
剡源为作传今托妙墨垂无穷方当文轨四海同草木犹沾雨露浓他年奉诏寫王会圖
形共进蓬莱宫

题金人张珪芦鴈图

金源画马惟李早亦有张珪善花鸟寫生八鴈芦渚边眼中彷彿龙河道双飞双栖
嚦嚦宛颈求其雌大泽雪深一丈许踪有矰缴将奚施

谢陈彦廉惠绵

三吴蚕缫甲天下阴阴百里连桑柘鸣鸠拂羽戴胜飞曲箔爰施墐庐舍春阳煦妪
子渐肥摘花汲水奉浴时终朝内薄在懷抱宛若玄蚁初生蟒弱翎轻拂篋筐内早凉风
戾柔桑脆槔榼烟浓帘幙垂三俯三眠将委蛇簇上漘漘秋莲房功立身废茧如霜栏灰
浣水实泽器繅丝■《糸辟》纩寒冰光古者筑宫临水曲大昕之朝君乃卜繅三杯手

布三宫黼黻文章成祭服又闻炎汉中兴年萧条千里无人烟羣凶扫荡已灭迹野桑成茧櫓生田禾今风尘清海■〈宀禹〉五日一风十日雨深村何地不桑麻青燈比屋闻机杼我耕且学居岩阿两鬢刁骚柰老何短布单衣才掩骭饭牛扣角病身多楚夷抚巡江上屯三军皆如挟纩温古来壮士树名节感慨能忘一饭恩

题丘鲁山小象

鲁山道人巢许伦目烂岩电气吐云瘦節橫策走逡逡长歌青天风动羣不烧凡铅化黄银不书符篆役鬼神亦不漱咽玄和津东穷沧溟看扬尘西登维岭踰峨岷归来轰饮惊市人桃花一实三千春

题茅泽民临董北苑夏山图

羣山回抱中絕谷万木阴森嵐气溽知有逃名隱者徒扪葛扳萝结茅屋北苑风流去不还尚留遗墨在人寰含毫伸纸能摸写优孟商歌抵掌闲

题茅泽民蟠松图为陈彦廉寿

太丘仙人初度日高景山前览秋色才名不减郑广文百年纔过三之一（时年三十三岁）长松卧地数百弓全生不与社栎同苍髯鲐背冰雪操根有虎魄燕支红茅君欲驾茅龙去为貌婉蟠入囊楮蟠桃再食河再清迟子披图重延伫

题张子政黄大痴松亭高士图

大痴老人天下士结客侠游非畫史酒酣泼墨写荆關咫尺微茫数千里簷簷泉头鹤上仙空遗寶绘人间传弟子颠张早入室重冈迭嶂开云烟太山斗絕何由緣下有鸟道丹梯悬此中疑是避秦处仰见茅屋岩崖边松亭蒿目者谁子耳谱流泉横綠绮不知快捷方式在终南每逢佳处輒留止我生亦有山水癖吴楚燕齐徧游歷风尘澗洞难再往坐对此图三太息

题周原素临赵文敏公十六马

宋诸王孙面如玉书法鍾张畫顧陆寫唐内厩十六马笔精墨妙天机熟忆昔岐邠开八坊四十万匹皆骏良平原牧放乐字育泉甘草肥筋力强丰水东注波汤汤柳花吹

雪桐阴凉平头奴子骑先出两奚控勒临堤傍骓駢驻骆驥嘶黃徐驱俨若駿鴈行有骅
却立不敢进畏前反蹴头高昂三马欲复俯饭水一马已渡将腾骧中流夭矫乃龙种两
耳批竹双瞳方斯图已归羣玉秘夜夜长虹光烛地何人援笔解临摸吴郡周生富文艺
中原板荡徧荆榛千金骏骨化黃尘摩挲老眼明牕侧展卷题诗一怆神

送田起宗回泉南次倪云林韵

烟树望中迷春流接断堤束装迟明发揽衣听晓鸡靡芜綠徧江南路蒲飄风轻云
外度香阁无人占镜听倚门应念来何暮花落野桃红雨飞春鸿社燕故相违白头慈母
高堂上彩服称觞春日晖

送孙惟善之广东次倪云林韵

綠遍江上草游子涉遠道雪消春涧花满冈南越三吴俱异乡桂林波生赤鲤肥涼
风萧蕭透綺綺华开黄菊行将归

谢伯诚所藏王叔明狼山图

忆昨鼓楫遡大江海门一点狼山碧安得振衣蹑层颠东望扶桑初日赤忽见此圖
心目明石壁铁削苔花青仙翁白狼不复见金银佛宇开岩扃上方台观云中起下瞰
■ 〈鱼蠹〉涛千顷水平原宅相放舟过吮墨含毫柁楼里江南有客顾而长梦觉池塘
春草芳生平爱画久成癖题诗缄封遥寄将千古风流犹未弭翩翩王谢佳公子日暮相
思江水深独立汀洲折兰芷

题茅泽民壁上松石

昔人画松妙入神毕宏韦偃及张藻宋三百年惟李成石磴烟林更深窈近世首推
文敏公尚书云山气势雄后来作者黄岩李修篁古木冈峦重中吴江南佳丽地前輩风
流犹未坠忽惊素壁走蛟螭乃是茅君醉游戲大者昂霄梁栋材根穿石罅貫鐵韁稚者
新承雨露厚密叶曾栖鸾凤来是中亦有支离叟欲同杜栎齐上寿不材固可全天年钟
鼎由来异畎畝轩中之人读韦编坐对松石心悠然焚香寓目竟白日默究未尽羲皇前

送市舶官

诸蕃之国南海阴岛居卉服侏■〈亾离〉音雕题椎结金凿龈犷骜如兽那可驯稼穡万斛檣林林夏秋之交来自南象犀翠羽珠贝金蘯合薰陆及水沈皇元率土罔有刑三边扰攘兴甲兵梯航梗阻民弗寧重臣分阃号令伸殊方慕义相附亲词叱蛟鳄驱鯢■〈鱼蠹〉海不扬波如■〈石互〉平倭东太仓吴要津襟带闽粤控蛮荆贾胡夷蠒贡赆琛闕讥互市什一征抚绥覆育德泽深犹虑苛细失厥心夫君矫矫东南英温恭廉洁迈等伦承命监视慎章程两周星霜秋复春长涂萧萧征马喧回辕不载薏苡行夫君夫君明且清自兹步武趋王庭上陈民瘼摅忠诚愿化愁叹为驩声

沧江月色圖

水寒月明天苍苍欲落未落夜未央足扣两舷歌沧浪金粟图中见真迹中岳外史美冠裳江皋木落江月明坐拥锦袍调玉笙吹作昆仑双凤鸣顺流东下莫荡桨好逾弱水窥蓬瀛

晚節軒茅澤民畫壁次韻倪云林

前輩風流嗟已矣看山畫里聳然喜石脚下挿江水清烟嵒杳眇羣峰峙玩圖安得隨漁人桃花源上秦時民草木丛深蹊徑邃溪水春波花鳥新二尘隔斷那能往勝地虽遠神偏親清詩憂玉題壁畫森列琅玕共琪瑜福地蕭森雖只尺側身東望嗟風塵魚牙異香尚留意得與不得寧須噴（澤民許惠羅斛魚牙未至）何如晚節老居士默究不二心尤勤彩衣行酒列孙子高軒窈窕當南闈人生會合良有數飄散倏忽如烟雲重來握手成大笑滄溟水淺三千春

黃大痴云山圖

荆浩關全善山水大痴繼作非俗史技藝畢給世稱賢图画乃其余事耳簫箕泉頭月蒼蒼蟬蛻渺淥凌風翔斯人九原不可作泚筆題詩增慨慷

樵風軒為鄭生賦

鄭生城居苦迫窄一軒下榻聲吾伊庭前書帶經雨潤階下山硯含露滋吾聞白鶴山前削立青芙蓉絕頂中有仙人居金堂石室相萦纡樵翁采薪得遺箭笑授覓者心勤渠仙亦懷私施狡狯旦南暮北風徐徐我登樵風軒為歌樵風謠委江東下何滔滔碧波鏡涵天宇高願風卷水化甘雨淨洗海內無炎歎

题任月山圉人调马图

邠寧八坊全盛日牧马四十余万匹玉關沈獫野无尘奋鬢长鸣气骄逸就中一马如游龙两目夹镜磨青铜圉人骑入横门道霜蹠蹠雪生长风衡昔阅羣玉秘摸得兹图落人世海桑陵谷虽变迁犹是灵光岿然峙

赠葛进善

繄昔炎帝神农氏品尝百草医药始轩辕代起征不附浮化草木及虫豸乃延岐伯讲至道推研疾病死亡理灵枢玉函素问书剖析丝毫不明要指维秦越人太仓令用之攻疾良有以下逮炎汉长沙张论辨伤寒分表里魏晋徂唐不乏人脉经本草咸述纪金源卯金刀最良志复古学拯颓靡再传戴人术亦神后来继者东垣李用药攻守势虽殊异路同趋无遠迩遂令末学知所归遡流寻源终及委缅彼规规守局方仿若刻舟求剑耳娄东有客稚川裔尚友前修敦素履白皙丰下颀而长蒿艾之中见兰芷去年挟册观光游门外求医日成市太史雄文特笔褒五色云霞光墮地里人曾生客他郡触暑长涂行不已黄尘眯目口生烟乖沴致疾几不起竭来一视曰无虞投以囊中方寸匕煮而食之俄顷间外热已弭内泄止举家感德何以报索我长诗当纨绮诗成写赠媿不工愿保贞名垂信史

张蒙轩善制笔遂隱括毛颖传以赠

毛颖氏中山人其先明视者佐禹治东方居卯地死为十二神神明之后吐生子孙八世有■〈需兔〉当殷时得仙术匿光使物八月骑蟾蜍厥后不仕为隱沦狡而善走东郭■〈鶡，兔代鸟〉乃与韩卢互争能卢共宋鹊谋醢其家及其身始皇伐楚思兼并蒙将军恬将三军军次中山大畋猎筮以连山其兆得人与人文今日之获不角不牙被褐伦八窍长须而缺唇取髦资简牍天下同书咸祖秦遂围毛氏族拔毫载颖加束縛献俘章台宫上乃命恬赐之汤沐封管城宠任日见亲强记便敏工纂錄近悉当代遠结绳上自始皇帝太子丞相下黔首无不爰重同讨论曲直巧拙善随意虽见废弃默弗呻惟不喜武士见请时一临累拜中书令呼为中书君上亲決事衡石程宫人不得立左右独颖常侍至夜分陈玄陶泓褚先生出处则必偕友善相推称后因进见任使令拂拭之倾谢免冠髮秃摹画不称旨上頤嘻笑曰中书君今不中书不任吾用老且髡臣颖稽首再拜对斯所谓尽臣颖心遂归封邑不复覲日老见踈秦少恩吴人张蒙氏尚交千载上悯颖后无闻搜罗得遗胤散处宣城之敬亭雄英锐肖厥祖祇今崇文偃兵革挺身自

拔著作明光廷

杀虎行（安化县广文陶振作公号钓鳌叟）

停公射麋曲听我杀虎行逐虎虎不去杀虎心始平县官桑侯仁且明贤哉贤哉非常
诚高风不在宋均下善政直与刘昆并如何此物不出境伤人害畜来纵横梅山之南
梅山北大小人家争辟易青天白日不敢行何况黄昏山月黑桑侯闻之怒且嘻此物敢
尔强梁为为民父母不除害百里赤子将焉依遂令弓兵设陷穽果见此物来投机长戈
如雨点短鋒如电挥戟尖不掉丈二尺袍花已脱斑斓衣阴风一阵过墙去但觉鬼嚙
嚙啼桑侯亦好奇触眼见未有急呼青衫吏来唤钓鳌叟鳌叟走欲颠惊看立良久雄姿
猛势尚依然酷似天狼与天狗想当长啸下南山猿臂将军亦惊走想当独立向西风东
海黄公方掣肘重为告曰虎兮虎兮汝尝跳我墙伤我羊刮吾六畜为糇粮又曾穿我壁
衔我鵠惊动老夫眠不得尔来胡为落陷中百步可再生威风桑侯尔嗔不汝容汝恶贯
盈殲汝躬于戲猛虎不足言桑侯良可数前番曾传舒文虎絕似白门擒吕布今番又杀
锦于菟何异山嵎出冯妇城隍庙前箫鼓鸣纸灰飞雪梨花轻桑侯长得谢山灵山人把
酒来相迎酒酣拔劍啖虎肉一方之民歌太平

题龙头畫

疾雷破山风振海黑云卷浪天冥冥海藏龙宫昼不闭飞出老蛟千岁精两瞳烂烂
如秋月八十一鳞寒动雪倒翻海水散飞花直拥冰鬚上寥沉想当盘礴欲畫时辟歷一
声轰硯池初疑延平寶劍化又似雷泽神梭飞畫师亦无数此本真妙手点睛不让僧繇
先落笔寧居所翁后江西胡公欣得之价重骊珠三百斗重为告曰龙兮龙兮汝之头角
何崭然风雷变化在眼前愿将天瓢灵物洒洒作甘霖百万里净洗海中清气烟八荒稼
穡秋满田老农击壤歌丰年

耕学斋诗集卷七

●钦定四库全书

耕学斋诗集卷八

（明）袁华 撰

○律诗（五言）

夜泊淀山湖有懷鐵崖先生

鼓楫淞上游轻飄度泖洲对月耿不寐懷人殊未休征鸿唳沙碛微风生柁楼淀山青一点龙气落船头

杏林圖

董君遯世士高居庐阜山神方传肘后丹杏满林间采药猿持镢看书虎抱闕畫圖留好事遗韵邈难扳

送于彥成归越中

枫桥明积雪晓发剡溪舟独鹤横江去三山接海流綠尊倾乳酒白髮暝霜鸥天姥云门路曾同上客游

见山楼

窈窕飞楼上天然圖畫开云从桐井起水向柳塘回素月流书幌青山落酒杯何时同遠眺与子一徘徊

甲午岁丹阳道中即事

览古丹阳郡兴亡几战争山横季札墓江转吕蒙城壞垒烽埃赤荒墟磷血明卖刀仍买犊何日事春耕

昔年梁武帝葬父在平冈皇业寺犹在萧陵名未亡石麟蘊碧草玉鴈锢黄肠触事多兴感悲风起白杨

元戎拥貔虎开阖镇朱方勇锐知无敌骁腾孰可当阴谋周吕望决胜汉张良坐使风尘息论功宴未央

天设长江险悠悠万古情烟光连北固云气渺东瀛夜泛金山寺花游鐵瓮城也知

狂李白乘月醉骑鲸

闻道黃连破吴依喜欲狂渠魁竟授首遐裔尽来王洗甲浔阳水铭功赤壁冈總戎英且武疑是郭汾阳

平余吴东粟委输江上游泛舟雍继绎给饷马连牛坚壁虽皆破陈师尚未休将军身许国不解虱兜鍪

游侠谁家子操戈复父雠剽金当白昼被酒宿青楼意气倾京兆豪华拟列侯傥逢强项令枭首在竿头

水军新建节遴选尽英雄杭稻千艘发梯航四海通斩鲸朝拂劍闻鴈夜张弓独有玉山客参谋在幕中

娄港蒙冲发开飄驾海涛挥戈当落日杀贼竟清宵刀剗犀为甲鞭驱石作桥何人投笔研自拟汉班超

驰驱思欲迷恻侧重凄凄去国悲游子懷乡梦故妻断沟科蚪聚灌木郭公嚦独有平安字缄封手自题

丙申上己夜见月思家

三月初三夜溪楼见月生云连银汉白星拱紫垣明野寺钟才动荒村鸡乱鸣弟兄俱异县有泪似须倾

丙申岁有懷南北师友铁崖先生

第二桥边路问奇那厌频文章司马氏诗酒谪仙人笛弄莫邪铁尊开太古春梅边草堂好矫首隔风尘

张师允宪金

奉使趋庭日严霜委紫荆孝诚天地格忠义日星明未弭江东节俄罗海上兵潜身向何地天末暮云横

富珠哩子升經歷

问讯湖南暮
艱危无使来
兵戈何日息
舟楫几时回
云梦惟空泽
钱塘又劫灰
相思对明月
独立意徘徊

蕭元泰先生

一从骑鹤去
沧海变桑田
遯世陶贞白
移家葛稚川
灌园朝抱瓮
煮石夜分泉
缩地应无术
寻真或有緣

高则诚錄事

永嘉山水郡
燕服帝王州
献赋长杨内
从君沧海头
阿戎终放旷
小杜最风流
花满西泠路
烟波渺白鸥

钱成夫编修

忆昔钱塘别于今
十载余扶摇鹏鵠异
相失燕鸿如代祀
临南镇移家赋卜居
高林疏雨霁南望
正愁予

于彦成炼师

前朝将家子
学道越山中
卖杏虎收穀
吹笙凤集桐
鵠夷能货殖
处士本英雄
禹穴藏书处
璫文玉检重

学性海讲师

云扉景气清
曾听话无生
丈室文殊座
双林舍卫城
龙泓循故道
寶殿丽新甍
闻说胥江口
袈■〈波上衣下〉渡晚晴

秋夜

中庭坐深夜
诗思与秋清
零露沾衣湿
流萤度竹明
酒杯嗟量減
烽火唤愁生
断送

凄凉好西风鼓角声

种玉亭

种玉新亭下移来嶰谷中幽根留宿土醉日动微风杖化龙飞雨笙吹凤下空道人
参玉板避世隱墙东

挽铁崖先生

昔客钱塘日曾陪杖履行授经终卒业问字屡称觥南国衣冠遠东维砥柱倾平生
三史辨大义日星明

瞿允同梦侍其考野逸翁有鸟飞集其肘遂名其堂曰梦鸟

忆弟春吟草思亲夜梦鸟栖冠旌子孝集肘慰儿孤失喜承颜色含哀咏毕逋升堂
观返哺感慕重长吁

题倪云林山居圖

地僻无辙迹知为静者居山泉激石驶岩树覆牕虛洗药坐濯涧负苓行读书兹丘
傥可老吾欲乐耕锄

梦草池为谢伯诚赋

幽居絕蕭爽新綠冒芳池南浦春还日西堂睡起时弱鱗依密藻孽甲冒游丝矫首
思公子扳援玉树枝

渡吴松江

三江东海入渺渺际天浮鱼鱗松陵市珠犀沪渎舟季鷹终托兴鲁望旧追游自媿
犹驰逐临流羨白鷗

次韵埙大章梧竹轩聯句

会合维摩室微风满榻秋云龙韩孟句冰雪澈休流洗 ■ 〈角戈〉 桐阴落钩帘竹影浮干戈虽在眼慎勿赋登楼

听雨舟

枕书篷屋 ■ 〈广外互内〉 卧听雨声秋萧瑟芙蓉渚凄凉杜若洲何人游赤壁无梦过黄楼欲觅鸥夷子江湖渺白鸥

赋得金锡送文起周

开士金为锡飞行向日边穿林鸣落叶卓石涌清泉天末龙同往云间鹤共还始知木上座曾悟夹山禅

题倪云林所寄陈彦廉春草轩图

彼美陈征士幽居惬意素心字临张旭帖（彦廉所藏张旭帖）诗咏孟郊吟老圃秋花瘦闲庭春草深写图并琢句持寄白云林

倪云林同集

云林遯世士诗酒日陶情洒墨写虫篆放歌挥兜觥庭下幽花吐阶前疏雨晴不愁江路永扶醉出重城

耕学斋诗集卷八

●钦定四库全书

耕学斋诗集卷九

（明）袁华 撰

○排律

送殷孝伯之咸易教谕（三十六韵）

- 65 -

圣代崇文化贤良起草莱凤鸣旸谷日鱼跃禹门雷匠石无遗弃洪纊在劓裁咸阳
秦赤县博士楚宏材话别嗟吾老横经羨子才渡江淮浦迴泝颍蔡河开红树迎官舫黄
华暝酒杯纪行应俊逸览古定徘徊遵陆由梁苑冯虚自吹台汲京城屹屹艮岳石巍巍
蹋月车鸣铎嘶风骑卷埃吴音伧父讶儒服虏人猜应为青山住知悬白日境解鞍依近
郭纵马駔枯菱风急狐狸啸天高鸿鴈哀诗情秋共澹乡梦晓同催喜见烽烟息愁听驿
鼓槌虎牢悲战骨缑岭觅仙胎岳仰嵩高峙河看砥柱裁山川犹巩固风物亦奇核鸡唱
函闕启龙飞太华来碑亭矜汉好浴殿吊唐灾望极吴天末行穷渭水隈别家倾菊酿到
县动葭灰多士争先逐诸生获后陪献菹芹实豆舍菜酒崇罍五传遗经在三余万卷该
尊王明大义抑伯黜渠魁寒榻皋比设朝盘苜蓿堆树萱思奉母援柱念提孩有弟能调
饍何邮不寄梅五陵还突兀八水自萦回选胜筇扶手遐观笏拄颐壞基留宿草断础长
荒苔异域多佳处兹游寔壮哉丈夫四海志肯使寸心摧

次韵诸葛用中归真观三秀亭纪兴

舟次蒙城驿名山未暇登归真闻有观览古岂无朋小径松间入危阑竹外凭亭标
三秀异境胜万人称玉气朝凝润霞光晓散澄云房通曲密蘂殿肃严凝济胜资佳具扶
颠藉老藤未能忘臬兀岂敢肆骄矜长啸孙登解躬耕诸葛能华林散鹿迹断港聚渔罟
九酝浮鹦鹉三花覆罿■〈登毛〉潭清容可鉴谷响语还磨石上便清坐松根称曲肱
愧予才潦倒羨子思川腾扰扰磨旋蚁营营棘止蝇四三狙赋芋九万海抟鹏独客仍踈
懒顽仙絕爱憎行歌采芝曲归理读书镫空谷懷佳士孤云愧野僧賦詩慚繆拙聊以紀
吾曾

陈李子发解归席上分韵得三字

明诏初登士贤良起朔南太丘虽楚士厥贡逐吴柑昆玉连城重骊珠赤手探桂扳
仙窟一浪击禹门三突阵神初王冲围战始酣摛文陈礼乐射策黜奸贪归日逢重九高
朋喜盍簪黃花映朱寔紫蘋间银蚶酒泻杯中綠风生席上谈明年京国路春水染袍蓝

送李同知

授节明光里分符淮海得家传三礼学夜絕四知金蜀郡流芳遠鄱阳种德深熬波
输国赋剔蠹慰民心海王夷吾策徒讴子产黔政成还治所抚事动遐吟

送葛进善遊金陵

抱朴子孙负异材丹成直欲访蓬莱高堂霜鬢双亲老遠浦征颣一舸开山入金陵
云欝勃江环鐵瓮水萦洄鵝黃色上官牆柳鄂綠香飘禁籞梅献賦定趨鳩鵠观題詩拟
在凤凰台少微光动三台近重译音翻九域来正旦迎春仙仗集端門待漏署鐘催公交
车独数严徐学战国犹称范蔡才直节事君真不忝高懷絕俗又何猜拾遺杜曲詩千首
逆旅新丰酒一杯威凤已巢阿閣日神魚終化禹門雷他時駟馬歸鄉里锦绣宮袍次第
裁

郑德明李廷璧同集頤仲瑛書畫舫分韵得天字

我爱山中屋似船曲闌倒影水行天畫推鄭頤同三絕書至鍾王可并傳把■〈角
曳〉俄惊天欲雪钩帘恰见月初弦黃浮鞠蘂鵝兒酒紅芼椒花玉鬢鯷北苑風流猶漫
仕南宮放旷任称颠栖鸟惊柝翻丛竹潛鯉听琴出九淵山拥雪巢吟木客樓居云海宴
神仙囂时会合須強飲莫惜狂歌醉扣舷

徐种云检校湖光山色轩

涌金門里春如海虛閣亭亭瞰水涯畫棟留云高缥渺雕闌轉月澹交加杜陵万里
橋頭酒賀監千秋觀里花樹樹芙蓉圍別港雙雙鸕鷀聚員沙游絲趁雨蒙紅樹香霧隨
風度碧紗隨水荒涼安足數郎官空閑未容夸牕含嶺雪通三島塵遠壺天貯九華（所
藏靈碧石号壺中九華）歸去漁舟聞欸乃坐來枥馬絕喧哗自緣丹宸曾投策應用青
門學種瓜始信登瀛元不遠銀潢从此泛仙槎

耕学斋诗集卷九

●钦定四库全书

耕学斋诗集卷十

（明）袁华 撰

○律诗（七言）

寄张师允御史兼柬高则诚省郎

中台御史国元儒清庙雍雍列六瑚暂奉旗常司礼乐又峩嶭费谋谟河归故道朝东海日丽中天照八区遥想此时高錄事定陪骢马步云衢

送季景福炼师游武当

武当之山天与齐子往访道穷扳躋石乳春流飞肉鼠日轮夜转闻天鸡身试水崖松下石手援铁組云中梯归途傥遇白骡叟为我问讯君毋稽

次韵瀞天镜见招奉东云扉讲师兼懷张外史

曾陪外史清凉室二老风流老更狂海上留衣无吏部僧中爱马独支郎近传莲社开龙井更约兰亭泛羽觞已办青鞋仍载酒举杯同吸鉴湖光

小梅轩（舟名）

浮家一舸逐鷁瀛海微茫渺所思直欲星槎天上去何如雪艇月中移牕开山木听溪放帘卷江花看水嬉独倚飞轩瞰归鸟楚云湘雨念深期

次韵陈敬初陪贡泰甫待制降香姿上

使节煌煌照海濱锦袍光被宠恩新马班父子昭前史苏宋文章继故人甲帐冷风神欲语斗杓垂野月如轮礼成归蹋南州雪犹得延陪笑语频

久懷簪盍话深期又阻江亭把酒卮词客暂为迁客去德星还傍使星移放情自爱闲兼静违世真非懒与痴待理闔閭城下棹共谈京洛慰遐思

送赵季文湖州知事

昔日参军今幕府水精宫里又重来近除牧守皆清选况复参谋得大材山色满帘双燕入溪光照雪一舟回管公楼下花如雾应拟登临送酒杯

钱塘秋兴

木落江空鸿鴈横高秋倦客不胜情中原父老忧河决南徽黔黎望贼平汉武宣房
歌瓠子鲁连辽海却秦兵西风独倚层楼上把酒无言对月明

慈云岭下拜郊台遗老曾看卤簿来自昔祊田供黍稷于今辇道没蒿莱金河鴈过
沈寒日银海鳬飞化劫灰更上高丘表忠观残碑剥落重兴哀

秋江钓艇圖

我昔系缆桑落洲好山无数当船头大孤絕立小孤险江水遠兼湖水流扁舟老叟
钓斜日断崖古木含清秋草堂抚卷重感慨满眼风尘懷旧游

次韵答于彦成

贺监东归漫自怜思迷芳草綠芊芊闲乘野鹤如骑马醉着宫袍不上船晞髮定从
天姥顶餐霞应在会稽巅荔浆百斛山中熟肯向蘓家觅酒钱

次韵顧玉山寄

草堂东郭带烟萝门外高轩客屡过郑国上卿知叔向新丰逆旅荐常何柳迷官道
莺迁木花暝春江水动波已许芝云分半席嘉时行乐醉时歌

送强彦栗募农赴都

燕赵开田千里余募民南国课耕鉏豳风旧咏农官政大有重看太史书麦秀郊原
将乳燕花飞野水欲生鱼耕莘钓渭皆王佐行见承恩侍属车

答顧周道

司户漫怜称畫絕都官翻讶坐诗穷也知困顿尘埃里何似栖迟草泽中江日荒荒
连野白枫林槭槭带霜红春来拟约钱湖上聯轡看山踏晓风

寄湖南經歷富珠哩子升

洞庭湖南木叶黄桓桓宪府肃秋霜弭节还临楚王泽观风定到屈原乡澧兰沅芷思公子郢曲巴歌唱女郎好把音书寄千里冥鸿今已过衡阳

送友人赴都

闔閭城下送君初十月征途雪载车宣室苍生应有问新丰逆旅岂无书天开析木瞻辰极山合燕然抱帝居倚马定看书露布王门何必曳长裾

北固眺望

大江东下渺沧溟目尽淮山一髮青三国英雄终割据六朝文物已凋零寄奴故宅今为寺瘞鹤空坟尚有铭渔笛数声天外落客懷无赖倚阑听

金山寺

妙高峰下龙游寺小艇能为半日留灵物上随雷电化大江中抱石崖流涛头钟鼓鼋鼍伏鳌背楼台日月浮欲汲三泠泉煮茗谁将长绠取深湫

送友人授馆崇明

中州人物旧家声皎皎风姿玉雪明过海彩舟无百里传经绎帐有诸生夜瞻北极天如盖晓望东瀛水似城椒子花开春又暮好将书札慰离情

寄于彦成

庄北庄南雨乍零繁花如雪照空冥玉壶美酒拈重碧石室藏文翻杀青儻忽无烦凿浑沌春秋有待问冥灵松颠骐骥飞行处定约麻姑访蔡经

答缪叔正见寄兼东琦元璞

闔閭城里连朝住秋雨秋风过客稀且泛征君彭泽菊谁歌义士首阳薇清霜满野羣鸟下遠水兼天一雁飞忆共孤蓬萎水曲行觴聯句月中归

空城落月噪饥鸦殷地秋风动鼓笳洗甲天河无壮士驰车原隰有皇华人生扰扰

投林鸟岁事忽忽赴壑蛇只许龙门看泉者笑挥谈麈落空花

寄岳季坚诗客计筹山杜丹丘洪碧海

床头有酒未为贫汗漫山林一散人已过丹丘期洗髓还从碧海看扬尘楼开千嶂
云霞曙泉落双溪草树春何日相从问真诀綠阴深处岸乌巾

送汤子诚帅掾

掾郎匹马南關去木落江空送鴈羣不但鄼侯能给餉也知韓愈解从军连營笳鼓
花邊合小隊旌旗柳下分況是大藩財賦地哦詩橫槊屬夫君

次韵钱思复五山留题

兰舟东下泛沧浪路入仙源草木长彩笔题诗情自适白头倾蓋意难忘坐深河汉
星流屋语久芙蓉露湿裳別后相思对明月吴江枫落有清霜

丙申正月十七日避地商墓

溪閣春明雨乍停游絲百尺墮牕棂燕歸故國靡蕪綠戰退空原磷血青未見王師
除叛逆謫將詞賦慰飄零艱時會合須謀醉笑指丹泉泻玉餅

今朝雨晴天气好黃柳叶深含夕曛高閣下臨平野闊青山中断大溪分樹嗟江夏
桓司馬詩憶天台鄭廣文海內風塵猶未息書生亦欲學從軍

次韵王叔正陪李廷璧郭希仲同集玉山草堂

亂離又見腊嘉平訪舊仍同上客行報國終慚結袜子出關應慕弃繡生濤江水發
船如馬雪浦春回柳似城懷人索句草堂里南望孤雲多遠情

草堂夜集

花落銀盤蜡炬紅杯行小閣夜無風應須通籍金閨里且要埋頭曲蘖中石室書紬
司馬史草堂吟絕杜陵翁酒酣莫笑蹠狂甚我欲相從蓋次公

丙申嘉平二十四日燈下偶成

岁晏萧萧风雨生交年节近月书正杯盘罗列昏祠灶鼓角悲淒夜扞城未献椒觞
陈雅颂且分豆粥泛膏饧乞将得酒年逢酉会见承平息战争

陪赵仲光顧仲瑛游昆山

林壑秋高絕点埃畫船载酒对山开霜明遠浦蒹葭老木落空江鸿雁来魏国王孙
多丽藻华阳真逸有仙才翠微阁下经行处重为题诗拂紫苔

病中次韵答诸葛用中见寄

连朝寒热相攻战帕首伸吟拥被眠头但岑岑如砭骨身常兀兀似乘船漫怜方朔
饥求米谁似蘿卿冻啮毡料得故人同寂寞客窻泚笔寫诗篇

避地移舟江水濱风尘愁杀未归人夷亭城下空懷土甫里湖边又见春日落长林
鸟乱叫雪晴大泽鴈飞频题诗寄遠还相忆坐对梅花月色新

玉山对雪

玉山山中岁未暮斗柄先回八日春水边杨柳开青眼臘外梅花似玉人得子须当
探虎穴上书谁解逆龙鳞草堂对雪栖禅夜定有惊呼祈孔宾

送张天爵奉贺正旦表航海赴都

相臣奉表天边去使者乘槎海上行旌旗影拂波涛静宫殿春开日月明中原未必
无王猛前席须当问贾生风景不殊民物异江南遗老望休兵

颶檣跋浪驶如鸿缥缈神京在眼中天地未明先见日九天直上更凌风蓬莱水弱
流清浅龙虎台高气鬱葱咫尺凤城春似海五云端拱帝王宫

耽耽双阙起中央缭绕红云黼宸傍麌史已书王正月凤函初上帝封章殿头杨柳
黄于鹄海子鴛鴦白似霜拜賜君恩归佐郡锦衣光彩照高堂

忆得长淮汙漫时楼台歌吹锦城围吕梁水落河魴美芒砀霜寒野雉肥道路久无人北上關河空有鴈南飞可怜风物非畴昔蒿棘如林蔽夕晖

青松白石轩

高人种玉玉山中上有支离之恠松絕壑云根蹲虎豹阴崖雪干攫蛟龙青精饭受神仙诀金粉花浮虎魄醲为折长枝当麈尾何妨踞石语从容

岳季坚王叔明梧竹堂同集时季坚将归黃鹤山

长日园池水竹阴临深展席酒同斟花开蒼卜五月雪果熟枇杷万树金未觉山王称旷達更逢顧陆写蕭森独怜黃鹤归耕者诗酒何时再盍簪

顧国衡海上归会于可诗斋分韵得从字

出处能全孝与忠寧辞大海驾蒙冲祇将礼义为干橹岂但韬钤悶虎龙烽火频年成遠别酒尊今夕复相从金符紫绶居重庆勲业当期上景钟

夜坐听雨偶成

哦诗听雨向西牕犹胜銜枚夜渡江赤壁焚舟惊破魏马陵斫木善收龐身经丧乱家何在老去情懷酒易降清坐不知更漏永抛书假寐对残缸

寄于彦成

欲采蘋花遗所思玉山山中秋日迟遙天孤鸟没苍靄急雨大鱼飞碧池握手过溪当此夕攢眉入社定何时独怜满地干戈起对酒毋烦重赋诗

方塘如鉴净无波花气生香雨乍过河汉露凉星斗湿江湖水落鴈鸿多不辞归隱在松菊莫遣移文裂芰荷安得手招笙鹤侶会稽山里听笙歌

留题长庆寺呈天镜净公

长庆寺普竹园寺西则会稽县学黄竹园境颇幽寂余将南归题以志别

阴阴双梓昼当门问讯昆耶丈室尊谪仙时过青莲宇异道或来黃竹园山近蓬莱
深雨露地邻泮水荐苹蘩会稽自昔多奇迹奈此南归驾短辕

芝云堂小集

池馆风微白昼长芭蕉叶大午阴凉蜻蜻点水高低见燕燕冲花下上忙酪粉蔗浆
银盃冻莼羹鲈脍玉醪香醉骑黃鹄云中去岂为睽离惨别肠

送岳季坚归黃鹤山

草堂新筑皋亭下鸡犬相随问去程牧犊漫传琴上操伯伦真得酒中情荷鉏曲涧
霜初下晞髮阳阿日始生莫向蘷时嗟不遇龐公犹隱鹿门耕

登绰墩

白云屏上倚危阑陡觉梅风四月寒云接姑蘓山莽苍春生泽国水弥漫秔稻再闻
输贡赋王师谁报渡桑干道人筑就栖禅窟好似香山八节滩

次韵酬鲍仲孚出郭偶成

春波门头春已深暖暖遠村树阴阴故人江海三年别老鹤云霄万里心暇日何妨
随步屨清时未许掷朝簪竹桥东畔斋居好尚记持杯对月吟

頤玉山新成钓月矶轩

荷莜行歌与世违鹤归城郭是耶非种桃道士玄都观泛月仙人采石矶大野龙蛇
方起陆青冥鸿鹄自高飞轩前一架蔷薇树犹放踈花向落晖

寄陆原祥

幽人抱道不出户水竹萧然绕旧居清坐自临修禊帖感时闲拟絕交书烟销艾纳
薰金鸭酒泻松肪脍鲤鱼日日题诗慰牢落未应与世顿相踈

送梅节判兼寄谢湖州（次韵）

白舫青帘海上回赋诗莫讶雨频催阮瞻作掾惟三语王粲伤时咏七哀阊阖风生
销酷暑換抢星堕净氛埃吴淞东接娄江水乘兴毋烦数往来

明公持节洞庭丘文采风流礼数优朱幡早盖干城日青雀黄龙大阅秋汉室兴图
恢邓禹唐家谏疏属韩休水西开土时相见烂熳新诗共倡酬

万姓流离荷厚恩依然桃李满深村谢安已起居廊庙梅福何缘隐市门喜见淳庞
如鲁俗不闻暴虎似羌浑政成奏对长扬殿赐酒应沾白兽樽

初适嘉兴次韵答鲍仲孚先生

于越败吴于■〈木齧〉李兵交岂意古同伤心遗老风尘际举目河山草莽中
白骨似霜秋满野大星如月昼行空独怜鲍叔偏如我对客挥毫目送鸿

七月五日送葛天民归湖州

倾盖相逢英妙年静依禅客兴萧然叩阍未上平戎策佩犊归耕负郭田水落乌程
溪似带星明牛女月将弦飞楼结傍长松树最爱青山堕几前

武林即事

不到钱塘已五年故交零落倍潸然何人拔劒歌玄武有客题诗拜杜鹃锦绣湖山
多虎迹莺花巷陌断人烟伤情独有中天月依旧清光照冷泉

切云雉堞崔嵬气压江山势壮哉万骑貔貅金作甲九關虎豹玉为台弃繻独羨
终军志保鄣唯称尹铎才天运循环真有数腐儒白首重兴哀

次韵寄谢钱塘

新开别墅对西山燕坐凝香日闭關鶼鶩先鸣农事动兜鍪不举羽书闲花前五马
春游乐月下双鞬夜逻还上番梅花曾有约旧题重拂石苔斑

施克让大监以効忠输贡南来会于钱塘

秘监风流鬓未丝为询忠义向南陲黔黎思汉中兴日绣斧还乡奉使时金匮紬藏
书瀨瀨木天壤直漏迟迟好期勲业书麟史行赞谋谟入凤池

海内纷纷乱若丝乘桴直泝浙江陲中原将帅休兵日南国梯航入贡时贾谊感时
多太息冯唐投老尚栖迟客牕独坐无聊赖静数飞花落研池

还归凤阁掌纶丝况尔风烟静四陲海上乘槎无博望關中置驿有雷时羽书已报
荆襄复饗运休嗟蜀汉迟圣代秘书皆宰辅扶摇九万起天池

送唐本初之茅山

唐君本出公房裔寄迹黄冠鬓已华欲访洞经参玉诀不求句漏觅丹砂弟兄得道
惟茅氏父子登仙有许家老我平生遠游履尘缘未断独兴嗟

九老仙都印未剗华阳宫阙耸高寒隱君书着登真诀长史碑题旧观坛望拜竹宫
流燿火步虛菌閣侯神官姓名已在龟台籍鹤背风清聚鵠冠

阙中孚予同年也至正丙午五十一岁中孚上有慈母下有曾孙一门五世十月廿
又四日适逢初度赋此以庆之

同生延佑丙辰年惟子斑衣舞膝前上寿百齡尊齿德一门五世见曾玄筭與春侍
花间去竹马朝迎柳下还有子有孙皆孝敬山南崔氏世称贤

野航轩

轩开花柳照波明嘯傲篷牕悅野情恍載春流天上坐翻疑晚饭越中行携家未遂
鵠夷隱泛宅甘从甫里耕不问主人当往造樵青还解笑相迎

梅花泛酒

姑射仙人挾曲生醉乡寄迹类浮萍影沈若水惊橫玉香散黎云梦吸鲸止渴屡呼

仙掌送和羹错讶素娥擎倾杯片片沿流去应误渔郎放棹行

挽张子英别驾

潇洒丰姿冰雪如甘泉闲止有斋居囊中秘诀神人授墓上雄文太史书曳杖军门曾献策归耕田里欲县车双钩晋帖皆希世洗玉池空月影虚

送人归京师

秦淮水落大江奔西溯兰舟海上村柳色晓浓鶗鴂观棣花春韡脊令原紫髯上将初分阃白髮慈亲政倚门归向高堂躬定省对床风雨拟重论

送钱虚白炼师还茅山

青山卵色起中天马领良常紫翠连双璧已蘊秦相篆五鍾犹记地皇年黃连乳燕神初下紫术膏成骨易仙安得同骑大鹤去华阳南便觅真诠

双舄凌空去莫扳惟闻飞佩玉珊珊故家遗老俱凋谢采药名山自往还鳳尾盖随云影动鹿皮冠映雪痕斑海桑陵谷虽迁变独有壺中日月闲

寄钱淮南

风清淮海水无波缓带轻裘自雅歌玉垒金城严虎豹丹书铁券誓山河也知韩范懷经济不数仪秦用揣摩况是玉堂挥翰手纪功铭向石崖磨

全吴分阖镇殊方坐拥貔貅十万强蓄穀广田推邓艾运筹决胜属张良储胥蔽日清江浦■〈禾罢〉稊连云白水塘时忆壮游兴感慨相思目送鴈南翔

送闵炼师省兄还茅山兼柬钱虚白

伯兄兵隔海之隅仲也东寻轶两鳬闵氏圣门称孝子道家句曲号仙都埙箎迭奏宫商合风雨连床语笑俱此去定逢钱逸士为询艺术寄来无

耕学斋诗集卷十

●钦定四库全书

耕学斋诗集卷十一

(明)袁华 撰

○律诗(七言)

题吴景谅草堂疏后

太息神州已陆沉归营别墅掷朝簪
闲居自得安仁趣乐志仍存长统心架竹依垣
开鹤庆凿池引水置鱼跃谁云海内无知己周鲁高风重可寻

送洪宰相使还高丽

回望三韩云海间趋朝竣事又东还乘槎夜渡鱼龙国持节朝辞虎豹闕带砺山河
称汉辅疏封爵士拟周班来承王命勤修贡棣棣威仪重可攀

次韵奉答张云门应召北上

开遍南枝鄂绿房虚斋坐对挹清香春浮鬚颊杯中物寒涩笙匏腹内簧诸子客梁
文最盛两生在鲁学尤长轺车趣召趋天禄赐食从容得屡尝

送秦仲方崇明儒学训导

明诏春颁出紫宸党庠遂序法成均运筹廊庙皆熊虎奋迹丘园尽凤麟七步词章
年更少一门孝义老弥醇清朝偃武崇文化始信儒冠不误身

海雪轩

海天漠漠雪纷纶横槊冯轩欲问津蓬峤有山皆削玉桑田无地不扬尘絮穿蜃窟
楼台晓花压鲛宫观阙春待泛仙槎凌汗漫绝胜放棹剡溪演

送陆原祥还江阴

十年为客昆丘下把酒临风语笑同南越称臣归陆贾东吴辟地识梁鸿异乡第宅蒿莱外新国河山雨露中锦服昼还春政好河豚鱼上杏花红

送刘炼师还龙虎兼简祝洞天周白士

海上东还独杖藜柳花飞雪乱莺啼琅函寶篆皇人笔玉检丹经外史题圣井山开龙起蛰璫林台迥凤来栖洞天白士今何许犹忆西湖手共携

次韵答秦仲文

校文东观继前贤归隱蕭斋日草玄汲冢周书雠蠹简穀城黄石授韦编怒撞玉斗鸿门宴泪落金铜汉苑仙览古懷今莫惆怅还听稷下衍谈天

偶成

不能捭闔与从衡啸傲丘园养性情燕雀安知鸿鹄志麒麟终异犬羊生茅櫺雪霁书声遠楮帳风微梦寐清但愿太平身健在一犁春雨课儿耕

寄石仲濂市舶

野雉朝飞麦满田春明泽国静风烟鱼虾鱠蛤三江市象贝珠犀百粤船艤把槟榔盘内荐肯将薏苡橐中还酒杯遠寄承相忆迟子归来对月传

寄印月潭讲师

梓树峰头日色冥杖藜徐步过岩扃道腴已味中边蜜心定能驯大小青阴合竹牕云散漫声来草阁雨淋泠也知丘壑因人胜未必山川自有灵

次韵酬张左司

墓田丙舍郭西头霜露淒然又暮秋千里故园归梦觉五更残月向牕流蓼莪诗废门生诵风木情牵孝子忧少展经纶佐戎幕碧澜堂下放船游

寄兴圣琦原璞

每懷宴坐月當庭石室堂頭老寧馨家廟至今傳邑子平湖無復墜天星貌床花妥
揮談塵龍鉢珠明護賜經不叩禪關已三載新松應長過檐青

素华轩

素封家開素華室乃在練祁之水旁千樹梅花浑是雪一庭月色只疑霜神游空洞
生虛白潛心內景修中黃未饒剗曲多清思乘興須當泛野航

過南翔寺簡勝仲殊

齊公昔建阿蘭若唐刻今存窣堵坡井邑人非雙鶴去江鄉日落一舟過夜坛暖足
無玄兔曉室聽經有白鵝問訊東林蜜殊老中邊之味近如何

寄金西白次韵秦文仲

金爵觚棱台殿重陰陰寶樹瑞烟濃龍章上揭文奎麗象教東傳大國宗特進禪林
開士首絕勝侯爵太中封遙思對榻南莊夜杖錫何時得再從

送偰公文出使高麗還京師

煌煌龍節海東還不易冠裳立筭班惟用一言通絕域何須三箭定天山陪臣奉表
梯航至異姓封王诰印頒陸賈當年成底事寶刀游騎未吾慳

西雨轩

拄笏朝看爽氣生卷帘晚見濕雲橫漏天未補媿皇石噀酒俄傾蜀客觥闌風來
先拂奧桑榆日薄又開晴載歌暮卷西山雨始信王郎負盛名

送卢公武应召北上

前朝圖史已全收詔起丘園重纂修治定功成遵禮樂大書特筆法春秋金壺墨泻

朝挥洒银烛花销夜校雠进卷内廷承顾问鹤袍端立殿西头

书声斋为钱生赋

幽人读书茅屋底况是前朝忠孝家宛若商歌出金石又如长啸隔烟霞风传清漏音相答雪洒虚牕韵更嘉洛下诸生应效咏却怜司马听琵琶

直沽即事

鸾舆北狩神京日车骑回屯海浦秋草地霜寒散驼马旃庐日夕下羊牛革囊桐酒醺人醉芦叶吹笳动客愁可见太平忘武備蹋歌顿足拥貂裘

沙门宛在海东边白浪漫空雾涨天屯卫遠分貔虎队岛夷潛匿蠻船蓬萊清淺高秋见碣石苍茫落照连应笑嬴秦那鮮事虛劳徐市访神仙

送卢拙闇游茅山

卢郎抱琴别我去驾言往采茅山薇三峯月下木客啸丹阳湖中姑恶飞筭輿问程溪店遠芒鞚蹑云林徑微归来袖有長生药乞取刀圭意莫违

无题

玉树参差障羽幢旧愁如水漫春江葳蕤鎖合收银钥窈窕樓空闭绮窗蝉凤横钗终作对舞鸾窥镜强成双绣屏倦倚看红豆满眼相思意未降

环佩珊珊下汉皋璫楼风度欝轮袍琴心寄兴传孤凤华意留情属小桃金粟柱移筝上雁玉莲杯举掌中醪乘鸾一去无消息腸断神仙梦寐劳

燕语铜楼淑景移镜台香冷玉盘螭书传王母三青鸟针度天孙五彩丝江浦见莲难觅藕石枰寻子未围棋独怜鹦鹉知人意飞傍琵琶索荔枝

裙曳湘罗漾曲尘雀钗小佩玉麒麟紫箫偷按云中曲彩笔慵传镜里真蝶粉腻花金作缕鴈沙回雪翠为茵若兰锦字多华丽不减风流赋洛神

题张外史登善精舍

阴森水石林堂幽六月彷彿如三秋高遁何慚孔车骑旧遊还忆董糟丘鹤台夜礼
紫虚象鳬鳥朝回黃篾樓愿乞引年餐玉法頡頏飞佩闌风头

送唐希颜入京师

挂席清江胜驾车柳黃梅白雨晴初不师鬼谷从衡术独善庖羲卜筮书绕郭烟花
春日丽对床风雨夜窻虛便邮频把音书寄莫待慈亲暮倚闾

瑞上人遠碧亭

亭子新开片玉东冯虛举目送飞鸿水穷鳌背三山小云澹蛾眉两黛浓诗咏墨华
懷貫老记存奇字忆扬雄知君览胜多佳趣尽在秋风落照中

寄天衣净天镜长老

会稽名郡素多贤翼举高风更凜然金缕賜衣梁代日紫檀遗象义熙年千峯秀色
层檐外双涧清流絕磴边遥想升堂谈法罢匡床镫火理残编

竹园寺里昔曾遊弹指流光十六秋諸刹每传新学起一簾犹为故山留文词雅正
推襄柳诗句清妍属澈休湖海老成凋谢尽杖藜何日浙江头

用韵奉答征懾原

忆得相逢春未深别来红雨徧园林江湖契阔劳清梦田野栖迟惬意心万壑千岩
应眺览五时八教重披寻天亲无着难兄弟剪烛何时对榻吟

江山如畫軒

杨子为郎鬢未皤旋开小室枕岩阿江如赤壁英雄少山似新亭感慨多林末涛波
来一线云边龛赭澹双蛾衰年不減登临兴拟待清秋着屐过

林泉民为张某赋

鹿豕同游说野情一廛愿受作编氓穷幽拟草愚溪记养拙甘从甫里耕春涧蕨拳
和露采秋林木耳带霜烹淮南有客歌招隱莫遣儿童识姓名

癸丑正月风雨中偶成

入春弥月雨霏微惊蛰无雷雪又飞抚节不愁花蕡晚感时惟恐麦苗稀当歌对酒
愁难遣向舍求田志已违只尺相望不相见空吟幅侧思依依

岁除风雨浃新正二月将终未放晴残雪不消犹待泮轻雷欲震又收声樵蘋后爨
愁童稚故旧凋零失老成推枕无眠清夜永淋淋檐溜百忧生

西爽轩

层轩新筑涧之瀆日射丹书草木熏天末火流秋沆砀冈头玉润晓絪缊清寒恍对
晴山雪散漫如瞻华岳云不似滕王高阁上珠帘卷雨又斜曛

寄倪云林先生

人日纔过春未深满城风雨昼阴阴又逢元夜传柑燕恰似重阳泛菊吟字写硬黄
当几畔砚分浅碧到溪浔从它狂客时推骂笑对青山酒自斟

过广陵

十年不到广陵城依旧璫芳弄晚晴绣被土砖于阗寺寶裝刀劍鎮南營樓飄簫鼓
云中起地接烟花日外明小杜風流今寂寞誰携紅袖按新聲

絃軍吹作鳳凰鳴十四橋頭璧月明欲把璫芳祠后土還持彩筆賦芜城小樓窈窕
低金缕別館蒲卜下玉罿醉寫烏絲遺所愛風流鬢鬚記三生

郭晞仲新庄

抱郭春流帶草堂四檐桐梓曉蒼蒼百花潭上詩人宅五渡溪頭處士莊且喜比鄰
連伯娣不愁行酒少兒郎西郊从此頻相過剪烛論詩夜未央

珠金沙

将军为国仗安危势弱兵孤漫出师江左望风如破竹沙边背水尚张旗可怜吴楚三军溃始信襄樊一木支扬子秋高波渺渺木绵春尽草离离

登桐川郡楼

桐川郡楼一登览好风东来吹酒醒数里已分吴楚地百年如寄短长亭凤凰遠举梧桐老燕雀生成桑柘青虛名得失何足论更尽沙头双玉錠

酒酣倚阑西日暮青山当户如高人银杏树阴不受暑蔷薇花开犹是春目送云霄瞻羽翮手扪河汉近星辰莫欺老子才情減还据胡床岸角巾

寄子明兄

我兄三月适上国贱子定省临高堂慈亲病已勿汤药弱女手解缝衣裳五云楼观烟花丽万里河山日月光司马多才年更少拟将词赋献长杨

次韵奉答卢伯融见寄

东老书多未是贫瘦生谁念苦吟身云横马首山如戟月过阶前鹤似人蘋武流离终仕汉扬雄寂寞却归新冥鸿肃肅清霜重独倚高秋落木津

送雷太守赴武寧

前席亲承大府开武寧政迓使君来也知刘项争雄地须得龚黄治郡才芒砀嵌空当野断黄河如带抱城回理闲引客登高赋应在重瞳戲馬台

寄休寧宰唐子华

尽说休寧邑宰贤清诗多与畫俱传弹琴垂帘白日静种花满郭青山连叶县归来候鳬鳩汎波浩蕩放渔船公余镇日浑无事好寫新诗寄一篇

次韵郑明德喜雪

水曹东阁静无尘坐阅飞霆若似人简授兔园曾作赋律吹燕谷欲回春缃枝梅放花无赖白战诗成笔有神遥忆龙沙三万里望中驰道烂如银

朔风吹雪徧原野谁卧衡茅若冻蝇玉署寒生催赐酒金盘光动忆分冰絮穿阁道粘珠箔花重旛房压彩绳田野何由称贺表五云高御六龙升

次韵秦文仲暮春见寄

三月江南暖尚微雨余草色故菲菲野棠自发真娘墓烽火犹连道士矶漫说尚方封事少未闻南国羽书稀何人得似秦文学小阁褰帘看燕飞

江南春尽子规啼愁里看花思转迷乳燕定巢当户语断虹截雨傍江低斩鲸政欲提三尺簪笔何由侍两闺满眼干戈连海岱置身安得月中梯

寄于彦成岳季坚

雪霁平芜带曲村思君白髮照清尊娇莺恰恰花连屋櫂柳青青水到门江阁遙山来遠碧草堂新月见纖痕风流二子居丘壑赋就停云一断魂

夜宿东阁梦中燕遊甚适觉而梅影上牕横斜可爱口占一诗以纪

梅花千树草堂南花气浮空若雾岚姑射山中春自好罗浮天上梦初酣蟠桃漫说瑶池晏仙桂徒夸月窟探万里仙游才一瞬不知双鬢雪鬱鬱

彩燕

剪开双尾出乌衣便逐钗梁小凤归晓倩婵娟红缕系春迎倭堕翠蛾飞香销金屋花无语影落妆楼月有晖慚愧年年一相见秋娘老去鬢云稀

寄虞子贤

虞仲园池芝水瀆华林曲馆遶人羣一编岂为穷愁着万石犹能孝谨闻玉躉金题

书满架锦衣珠履客如云悠然坐挹西山翠竇鸭焚香到夕熏

清明日偶成

舍南舍北柳如城故着离黄燕子鸣莫向镜中嗟种种且于槽下听枨枨清童解诵
高轩过好客应须倒屣迎坐对梨花浮大白人生看得几清明

丁未纪事

二月春城桃杏妍黃花离落景蕭然表忠曾护钱镠墓至德惟称太伯贤千古英雄
徒有录一时谗佞已无权早知鞭背东城路悔不归耕负郭田

列垒连营日战攻脱身虎落自从容但知蜀国专王建尚记虬髯拟太宗冠服未遵
唐制度河山已入汉提封一时佞幸空遗臭拜赐黄金口齶痈

入叅帷幄运奇谋翼赞功成礼数优华盖醉樵周尚父军营借箸汉留侯有身暴露
家千里无骨归埋土一坏多少门生并故吏不知还有孔车不

登台入省總权纲坐拥全军势力强檮李未闻丞相死会稽先报大夫亡提孩感动
犹垂泪行路兴怜亦断肠借问谁能为此计斯人今已葬江乡

熏天富贵复何求又欲飞行驾鹤游董卓脐燃郿坞日嵇康兵解洛阳秋谁人浙党
攻闽党此輩清流投浊流栖老园中荆棘徧围棋墅里鹿麋游

敌国兵连地数侵寿藏高筑徧山林嫖姚破虏辞营第太傅还乡散赐金陇卧牛羊
春短草穴穿狐兔夜堂深清明麦饭无人酒日落风颠叫忼禽

马公着见山楼

徙倚霜林万木秋好山都在马家楼大江西上经秦望巨壑东倾见沃洲半夜书声
天外落四檐云气座间浮登高作赋休懷土拟泛星槎问斗牛

送嘉兴經歷茅某之松江府判

柳塘水漫晓扬舲离思乱逐花冥冥芙蓉旧种叅军幕芍药新开判府厅三江龙蟠走海白九山凤舞入云青理闲觅句坐长日芳草芊眠春满庭

巢云轩

三素云中结一椽致身萧爽思悠然自怡遠效陶贞白览秀重懷李谪仙气合虎龙交鼎内影随莺鵠宿檐前肯输艮岳为朝贡拟化商霖润旱田

寄卢伯融

乘桴东下避风烟矫首淮云思惘然涨海涂泥皆树艺授经子弟總才贤青鸠紫蛤尝登馔金橘红椒不论钱白髮满头俱老大冶游花底忆当年

浮家南北久离羣知尔移居向海濱白首一经能教子黃茅千顷比封君异乡花鸟皆春思故国關山半夕曛何日酒船还旧里青山对榻坐观云

寄默林普庆二长老恢复初首座彝天伦藏主

诸子才华老更成自慚蒲柳易凋零默林兵后山如赭普度春还树似屏尘拂寶花分半席几翻贝叶校羣經彝公阅尽毗盧藏立雪堂中有寧馨

庚子十一月望日大星殒于西南

岁十一月大星殒斗柄插子夜初更焰光烛地散霞彩芒角经天如月明春秋重犯灾异见田里厌闻愁叹声临风劝汝一杯酒海宇何日歌升平

客甫里白莲寺答顧玉山见寄

风流王湛岂真痴世路崎岖蜀道危独酌花前明月我百年驹隙主翁谁南州名节称高士乱世功名属健儿海內承平欣有象忧天莫作杞人悲

沧浪一曲绕茅堂投老归来贺监狂鸾鳳岂因梧竹止鴈鴻亦为稻粱忙荣名身后嗟何用浊酒生前醉不妨雪里梅花迥高洁结交岁暮莫相忘

江村十日雪不消茅屋难禁风怒号高隱何殊醉侯放浪遊端似水仙陶大星中天
光煜煜孤鸿断野声嗷嗷老夫畏寒闭户卧那辞百罚醉酣酌

寄蒋都事

忆得吴门话别时乱离十载信音稀盈颠白髮今吾老满眼青山往事非天上郎官
应有象江南倦客尚无衣遥知李监欢迎处绣服当春又昼归

水月清华亭

昼锦堂中结小亭方池如鉴照檐楹山河影落蛟宫迥苹藻光涵兔魄明神女凌波
遗玉佩素娥飞轡下瑶笙一尘隔断人间世独倚高明爽气清

赋得禹庙送人之越（代作）

大禹神功别九州岛巍巍古庙越山头玄珪告锡昭成绩洪水懷襄息橫流雨湿梅
梁灵物化香凝龙袞瑞烟浮送君再拜瞻遗象梦叶熊罴在运筹

雪山圖

云气浮空高复低石林茅屋望中迷山回鸟道青天上水落鱼跃碧涧西欲访松乔
穷绝顶直扪萝葛蹑飞梯归来城郭还依旧坐对新圖赋紫溪

唐本初西郊草堂

草堂小筑西郊外孔杜风流尚未隳岂但山灵回俗驾还因录事寄新诗柳塘飞燕
穿书幌花墅啼莺近酒卮从此门前多辙迹老翁莫厌客频来

次韵刘伯叙送铁教授奉表入京

广文拂晓发东瀛函表乘轺赴帝京双阙遠瞻龙虎气层台重听鳳凰声花迎彩仗
春风软柳暝宫袍晓露清况是江南佳丽地金尊莫惜倒乌程

重韵寄刘伯叙

恩荣曾锡燕蓬瀛五马西来自玉京江左衣冠传旧族海濱謌颂动新声蒲轮结驷
登金马茝石听莺覲紫清此日牛刀聊小试还居台辅定章程

耕学斋诗集卷十一

●钦定四库全书

耕学斋诗集卷十二

(明) 袁华 撰

○絕句

题野航壁

綠水滑可染白石明可把高林落秋声谁船系其下

頤玉山园池十有六咏

碧梧翠竹堂

桐花落银床竹色被兰渚六合飞炎埃高堂不知暑

玉山佳处

玉山最佳处牕户絕纞埃门无俗士驾禽鸟不惊猜

钓月轩

闲耕山中云坐钓溪上月仰看白玉钓下垂紫贝阙

湖光山色楼

嵒起天边雨帆飞树杪风湖光与山色倒影畫樓中

芝云堂

堂阴有奇石如芝复如云望云懷友生采芝招隱君

漁庄

公子不好猎小庄濠上居長船載大炬清夜看義魚

种玉亭

采得昆冈玉连云种小亭月华润灵雨虹彩烛苍冥

百花潭

朝乘百花舫暮醉百花潭纖纖潭上月流影照清酣

小蓬萊

露下仙人掌云生玉女媧弱流三万里飞度寶魔幢

可詩齋

东閣觀梅放西池夢草芳絕勝駄背上風雪灞橋傍

浣花溪

花迷巷南北水接壤東西行春向何許只在浣花溪

柳塘春

燕尾艎飛水鵝黃柳覆堤水流花似雪疑是武陵溪

小游仙

麟哺麻姑擗桃花缕母栽天家青鸟使飞去复飞来

读书舍

芳草生书带香芸辟蠹鱼钩帘双燕入长日坐看书

鸣玉洞

此君有清节高居在空谷吹箫蹑凤翎珊瑚鸣佩玉

金粟影

金粟花千树银河月一轮举杯邀对饮天上谪仙人

采上人南涧圖

箕踞长松下溪流如白云美芹采南涧可以奉吾君

溪山高士便面

杨柳拂溪流风牵荇带柔前山青可数停楫坐船头

题李嵩会茶圖

穀雨初晴花乱吹金河春水腻如脂掣饼小试团龙饼想见东都全盛时

春日偶成次韵

竹楼晓日明踈檻松径清飙度曲棂遠水微茫云外白边山缥缈雨中青

南高峯下前朝寺寺有高僧两耳长当记清秋凉冷后桂花深处坐焚香

坐深鱼鸟自相亲野老忘机欲卜邻柳外飞桥新雨过桃花水涨半篙春

次韵顾仲瑛书杜氏便面

乳燕初飞藕作花秋娘二八髻双了臂鞴微露真珠络疑是钱塘旧内家

杨铁崖顾仲瑛葛元哲约祭张贞居或者以它事所牵弗果元哲有诗谨次韵以速成之

湖阴窈窕画船开谁醉荒山墓上苔明日归舟载春雨风篁灵石几时来

香满芸牕昼未开白鹅湖上卧苍苔山风宿草吹新雨尚有高人载酒来

西湖春日杂兴

柳淡鹅黄雨弄晴断冈泥滑竹鸡鸣便须移席长松下坐听风泉落涧声

北瞻灵鹫山围寺东望初阳树绕台昨夜龙泓新过雨乱流花片入城来

西郊草堂对酒口占

一点飞花落酒杯大江如带草堂开尊前枕底天香满人在瑶台月下来

吴江道中

澹云收雨动微风山色湖光惨淡中双桨夷犹坐天上不知身在水晶宫

上巳日晚步商墓西村

桑叶青时戴胜飞红红白白映柴扉枣花欲落缲车响连臂行歌缓缓归

商溪溪上日初晴艳妆彩服踏春明桑树叶圆蚕出大布穀夜啼郎起耕

叶暗柔桑花乱飞新蚕如蚁燕初归纺得麻纱连夜织为郎制作下田衣

客吴兴春日偶成

曾听吴门唱大堤只今惟有野鸟啼故人鱼雁冯谁寄江水无情日又西

龙凤山青露丱尖溪头把酒月纎纎从教柳絮沾书帙满地春风不卷帘

桤林日暖蕨芽生桑陇风微布縠鸣客子思家政愁絕长松吹雨落溪声

双眉刷翠小红娘斗酒梨花为洗妆一曲纏头不知数扬州城内善和坊

深鎖春风罨畫楼杏花香里醉扶头何人得似任公子相府莲歌不解愁

杉峯双鸾寿意便面（集句）

横玉叫云清似水松杉峰外乱山青近得麻姑书信否梦中同蹑凤凰翎

天基庄菊花

仙子乘风过赤城金盘玉露掌中擎月明解佩江头去五色云霞拥绛旌

寓绰壑寿寧庵

栖禅窟畔好高树三静境中皆白云已翻瞿昙内外典更礼茅家大小君

北山何处境清絕藤轩阴生昼寒明月飞来散清影金沙布地为君看

柳塘春轩口占

横雨狂风三月余柳塘水涨起潜鱼花明兰渚坐垂钓叶暗芸窗好读书

快雨时晴暖尚微小亭帘幕护春晖曲尘波动鳬雏出金缕条长燕子归

送竇伯让还南台分韵得来字

落日枫江水似苔画船挝鼓大飄开栢台一夜清霜重并逐秋风白雁来

顧玉山客嘉兴春晖楼前木芍药盛开因诵张平昌所和令狐祖公别牡丹诗曰平章宅里一阑花临到开时不在家莫道两京成遠别春明门外即天涯因次韵别赋五首同寄

真态生香解语花脸酣春酒醉儿家陈王漫倚能词赋翩若惊鸿洛水涯

万卉千葩孰与京故人相见眼偏明金盘玉露倾朝日似对春风诉不平

烂熳春晖玉一阑香笼绣幄醉中看于今寂寞西园里无奈罗裳怯暮寒

三九清斋修洞房小楼午夜礼虚皇殷勤金盞收花露留待研朱校玉章

穀雨初晴三月时燕飞帘幕昼迟迟主人不见花开落欲倩徐熙写折枝

恆雨颠风春事非蜻蜓蝴蝶作团飞端端老去才情减不奈轻寒薄缟衣

水仙图（集句）

疑似瑶台月下逢强抬青镜欲妆慵风吹仙杖飘飘举五色云车驾六龙

宣和翠织成雪沙双鴈圖

鴈沙飞雪烂于银共诧宣和制作新何似帛书归上苑暮年冠劍畫麒麟

题郑所南畫

弓劍空遗瘴海涯南冠怅望泪偷垂满头白髮心如鐵自写幽芳慰所思

郑君独行今重见圖畫仍兼著述存多少梁园旧词客长裾又曳向谁门

吴缘鸾像

身跨于菟手执书鍾陵山峻路崎岖当时只合华阳去日写黃庭礼紫虛

黃葵蛱蝶圖

金茎倾日露华晞汉苑秋高燕已归赖有多情双蛱蝶翩翩时近鵠袍飞

马遠所畫握扇杨后题识于上

金粟花攢壁树开月明露湿玉阶苔尚余数迭香痕在曾向坤寧殿里来

列子御风像

四十余年郑圃居居人不识独耽书九天寥廓冷然去安用回风毕道车

吴仲圭墨竹

风生太液水微波霜影侵阶月色多截得昭华苍玉管多情簫史奈愁何

直沽偶成

草低沙软见牛羊烟雾苍茫落日黄燕女如花不相识笑倾马漚劝人尝

海雾昏昏水拍天马牛遗矢满平川翻思五月江南道万木清阴叫杜鹃

狸奴窺蝶圖

黑睛如线午风清贾勇潜身势不惊莫向花阴窺蛱蝶街头鼠輩政从衡

过清江浦

八里庄头淮水长清江浦边杨柳黄楚女窄襪小锦袖醉歌竹枝行玉觽

过能拙翁兰若

盐铁塘边草色齐我居塘东子塘西兴来相过不相问自把新诗竹上题

二月十九日遊董氏坟庵次钱成夫韵

明朝二月三十日三分已过二分春莫思万事且饮酒林外提壶亦劝人

草堂清集

芙蓉小苑落秋红声动帷犀瑟瑟风共说扬州月无赖紫鸾箫里露台空

绣被熏笼护暖云酒痕曾上缭绫纹秋风草阁梧桐雨清坐张镫校玉文

秋风细细动青苹甘菊决明开渐新禾黍登场鸡犬静买鱼沽酒醉比邻

清弓轩棹歌

东洄瀛海望蓬山西上昆丘遡九湾四橹撇波横鴈翅恍如鹤背载笙还

三十六陂春水生一百五日又清明轻帆低拂桃花雨醉踏船舷歌濯缨

水落天门放顺流何须百丈打矶头郎归不化身为石重扫蛾眉两点秋

赵魏公黄葵

天上王孙白玉堂曾瞻黼宸御袍黄寸心倾日应多渴露泻金茎赐一觞

仙山楼观圖

万山起伏如波浪中有璚楼掩靄间忆驾松颠骐骥去乱云堆里听潺湲

柳塘双鹭

杨柳眠溪春水生春鉏并立眼偏明莫思滩濑鱼虾美忘却云霄万里程

顾定之墨竹

八法从衡篆籀文墨池春水荡湘云任它门外风埃满日报平安有此君

题仕女

微步瑶阶不动尘妖娆岂慕宋东邻手援仙桂沉吟处谁是龙头第一人

不使铅华污玉肌内家妆束入时宜欲随女伴寻芳去只恐西园蛱蝶知

枇杷白头

枝上花开才岁暮叶间子熟又春残何緣山鸟头先白错讶韩家金弹丸

黄葵图

玉阶桐叶委清霜青鸟西飞汉苑荒犹有金盘仙掌上独承湛露向朝阳

梨花乳鸡图

乳雏出■〈〈士一卵，上中中下〉爻〉老雌鸣石上雄呼喔喔声同入春园
拾虫蚁梨花雪白近清明

送王炼师遊龙虎兼东周白士祝洞天

古洞曾窥一线天归来尘世又千年笑骑辽鹤闽山去荔子花开海月圆

磷磷白石龙泓下泉落清池月半弯忆与仙都周白士钩帘把卷对南山

耕学斋诗集卷十二